

U SE KE UA ITŠEPA

HLALEFO EA HAO

 Ha re tsoe re sa eme, nakoana feela joale, bakeng sa thapelo. Ba nang le kōpo pelōng tsa bona ba bakae ka mona, ha u batla Molimo ho u etsetsa ntho e ikhethileng sebokeng sena? Ha re Mo inamisetseng lihlooho tsa rōna joale.

² Ntate oa Leholimō, re batho ba fusoeng monyetla ho phutheha 'moho ka mona ka Lebitso la Morena Jesu, naheng e lokolohileng moo re ka U rapelang ka bolokolohi ka likholiseho tsa letsoalo la rōna, le joale. 'Me rea rapela, Ntate, litaba li lule joalo halelele. 'Me joale re sebelise monyetla o moholo ona oo re o fumanang. 'Me bosiuung bona re kenyē pelō ea rōna eohle tšebeletsong, ho rapela Uena, hore ho tle ho boleloe, ho thoe, "Molimo o no o eme lipakeng tsa rōna bosiuung bona, ho sitsa batho ba Oona." Pholosa moea o mong le o mong o lahlehileng ka mona bosiuung bona, Morena. Le e mong le e mong ea ngalileng, ba khutlele tlung ea Molimo. Ke rapella mokuli e mong le e mong, ba folisoe, ba holofetseng ba tsamaee, le lifofu li bone, litholo li utloe, poko le khanya li fuoe Jesu Kreste har'a batho ba Hae. E ke e hopoloe halelele, Morena, hobane re phuthehile 'me re kōpa mahlohonolo ana ka Lebitso la Jesu. Amen.

Lulang fatše.

³ Ka mokhoa, ha ho kenoa Ramada Inn, e ka ho khutlela lapeng ka mehla, ka mokhoa, hobane ke tlie koano khafetsa e kana ho fihlela ke—ke nahana hore ba tšoanelia ho qala ba ntseba. 'Me ke thabetse hoo, hobane ke fumane sehlopha sa batho ba khabane ho di-Ramada Inn tsena. E 'ngoe e Tucson le e 'ngoe mona, ba bile mosa haholo ho rōna, ho re lumella ho tšoara litšebeletso. Ha se khale, ha ke tšoere e 'ngoe ea ka, tlase Ramada Inn, 'me manejara a nkhanela ho lefela moaho rente. Ehlide ke mosa oo. Ke ntse ke e hopola ha ke parola linaha, hape, joale, bao ba mosa nqa balelapa la Molimo.

⁴ Joale re fumane, ho qala bosiu ba Sontaha se fetileng, kapa Sontaha thapama, ke rialo, tse ling tsa linako tse khōlō ho Morena, kapa bonnyane ho 'na. Ke ile ka thabela mahlohonolo a Oona, le bolekane ba Moea o Halalelang 'moho le batho ba Oona.

⁵ Ke—ke batla ho hopola, hore, re rapela Molimo 'moho. Uena u bokhethi ba Molimo, karolo ea Molimo, ha u fetoha mora le morali oa Molimo. 'Me Molimo o ka ho uena, o labalabelia thato ea Oona, hola u ka O lumella ho e phethisa.

⁶ Re tšepeile ke hona, bosiuung bona, motho o tla lebala lintho tsa matsatsi a fetileng, le ho beella tsohle ka thoko, le ho

tsepamisa lipelō tsa rōna hantle tšebeletsong joale; e seng bosiu bona feela, empa le sebokeng se tla latēla. Ntle le pelaelo ho phuthehile baemeli ba bangata. Ke bona ba 'maloa hape kalaneng bosiung bona, ba phuthehetseng seboka se qalang hosane. 'Me ke kōpa batho ba leng mona ba etetse tsoselsetso eo re tsoa e tšoara, ho re, ha e le ntho e ka etsoang, nka rata ha le salla seboka. Re tla hlophisa libui tse ling tse khabane. Moena e mong o sitiloe ho tla, 'me, empa mona re tšoere ba bangata ba tla tlatsa sekheo sa hae. Le 'na ke batla ho kenela seboka se tletseng, ho thabela botsoalle bona.

⁷ Ua tseba, re nyolohela mona joaloka bareri, 'me rea bua, 'me ka mehla re hlahisetsa batho sohle se leng ka ho rōna. Ke rerile sehlooho khetlo le leng, moo Jesu a itseng, "Bonang seōhla, ha li sebetse ebile—ebile ha li öhle, empa Ke re ho lōna esita le Solomone khanyeng eohle ea hae ha eso apare joaloka se seng." 'Me ha ke fumana, seōhla se tlameha ho hola, letšeheare le bosiu, se a öhla, se a sebetsa, ho ikhalimisa. Empa ha se ithuele lehlohonolo, ka bosona. Se iphetla feela, 'me—'me mofeta-ka-tsela o nkhella senonetso sa sona. Notši e momona makheha hantle pelōng. Se nehela sohle seo se se sebelelitseng ho se kenya ka hare. 'Me molaetsa oa ka ke o rea, *Reverende Motlotlehi Seōhla*, therō e batla e hlolla.

⁸ Empa—empa ho joalo, bareri ba inehela batho, 'me ho molemo ho lula fatše feela le—le ho mamela ba bang. E ka ho athamela mollo, re thabela ho lula tlas'a khanare ea ba bang le ho omosa lipelō tsa rōna ka Evangelī eo baena besō ba e bolellang batho. 'Me ke leboha haholo ho fumana monyetla ona ho etsa joalo. 'Me joale kea tšepa bosiu bona . . .

⁹ Billy o ntemositse hoba o abile litlankana tsa thapelo, kaofela. 'Me mona re ka sitoa ho hlophisa mola oa thapelo le holane re tlameha. Ua bona, le ka tlameha ho tsoela kantle ho pota le ka mane, le ho feta lehalahala la holo e lefifi, le ho nyoloha le ka mona. Le ka khoptjoa ke lintho tse ngata, ho ka fihla ka mona. 'Me ba holofetseng le liritsa ba ka thatafalloa habohloko, ho etsa hoo.

¹⁰ Empa ha re tsebe seo Morena oa rōna a ka se etsang. A ka tšoha a theohetse har'a rōna, bosiung bona, le—le ho folisa e mong le e mong ka mona, boloetse bofe le bofe. Oh, ke thabela ho bona seo ho feta mela eohle ea thapelo eo ke e boneng bophelong ba ka, feela—feel a ho bona boithatelo ba Molimo bo tšolohela har'a bana ba Oona ba nang le kutlo. Ke—ke rata hoo ka mehla.

¹¹ Ka tloaelo, ha u hokana le batho, ka mokhoa oa peho ea matsoho, ho ka tšoha, ha ke hopole taba eo e ka etsoa ke ba bangata haholo, be, ba ka re, "Ke behiloe matsoho ke moreri hore-le-hore, 'me, khanya ho Molimo!" Batho sheba moreri eo ke hona.

¹² Empa haeba u ka ema mona feela, ho rera Lentsoe, le ho lumella Moea o Halalelang ho folisa e mong le e mong, oo e mpa e le mohau oa Molimo feela. Molimo o ithuela thoriso eohle, khanya. Ha ho mang ea sieloang seriti sa letho. Ke moo 'na, bosebeletsing ba ka, lebaka leo ke sa finyelleng ba bangata haholo, ha e se ha . . . Joale, maobane bosiu, re lekile ho rapella bongata boo re ka bo khonang. Empa peho ea matsoho . . .

¹³ Ka tloaelo ke ka masiu, moo Moea o Halalelang a kenang har'a rōna ho Iponahatsa, ho Itsebisa har'a rōna. 'Me ka hoo, ke nahana, e le ea makhonthe, ha Eèna mohlomong ka boithatelo, ua bona. Nke ke ka rialo joale, "Monna enoa, kapa mosali *enoa*, kapa ngoana *eane*," ua bona. Ke Moea o Halalelang o tsamaeang kantle holim'a moaho ho bua le mang eo O batlang ho bua le eèna. Ua bona, boo ke boithatelo. 'Me hoo ho tlisa tsebo, hobane ke tsepiso ea Molimo, 'me hoo ho hlahisa tsebo ea Molimo ka boithatelo, 'me ho boetse ho theolela Boteng ba Oona har'a rōna. Re tlameha ho e bona le ho nyakalla! 'Me ho sa tsotelehe . . .

¹⁴ U re, "Be, letsoho la ka le ne le holofetse. Ke ne ke le teng maobane bosiu. Ha kea—kea—kea ntlaufala." Hoo ha ho amane le eona ka letho. Ho uena, e se e phethehile. Ha u a sheba letsoho la hao lekhatheng leo, u shebile tsepiso, ua bona. 'Me ka baka leo, u ke ke ua re, "Be, Moena Sekete-kete ha a rapela thapelo ea tumelo, kapa sekete-kete." Ke Boteng ba Morena bo u abetseng tumelo, u a bona, 'me O rometse Lentsoe la Oona le ho ba folisa.

¹⁵ Joale, maobane bosiu ke—ke boetse ke robile tsepiso ea ka. Ke tla leka ho e boloka bosiung bona, ha nka khona. 'Me joale motho o itse, "Ha u a ka ua tiisetra therō ea hao maobane bosiu." Che, ha kea—kea khona; hobane, ke tla u bolella lebaka. Ke ne ke batlile ho rera sehlooho, joale feela kea se lebala, *Empa Molimo E Leng Morui Oa Mohau*.

¹⁶ 'Me ka qala ka leka ho hhalosa ka Pauluse, ha a bua mono, a boletseng, "Rōna bao mehleng e fetileng," ka mohla o mong, khetlo le leng le sele ho la joale, "re ne re shoele, sebeng le litlolong; bao Molimo o ba tsositseng, phelisitseng." Joale, ua bona, pele ntho efe e ka tsosoa, ntho eo ho tsosoang ka eona e tlameha ho ba teng mono pele. Ke hantle.

¹⁷ Ka hona, ua bona, haeba u no u le teng boitsebelong-pele ba Molimo, joale u ntse u fetoha karolo ea Molimo. 'Me mokhoa o le mong ho fetoha mora oa Molimo kapa morali oa Molimo, u ne u tlamehe ho ba karolo ea Molimo, 'me Molimo ha u a tlala kantle ho uena. E tlameha joalo. Ke hantle, hoba o Mong feela, mohloli oa Bophelo Bosafeleng o mong feela, 'me ke Molimo, 'me ke Oona o inotši o nang le Bophelo Bosafeleng. Ua bona? Joale, 'me u ne u le karolo ea Oona, ho fihlela u ne u le bokhethi, kapa u le mohopolong oa Ona tšimolohong. 'Me hoo, ka hobane O no na hanne ka uena tšimolohong, hoo ho hlahisa khulo eo nqa ho

Oona. Ke sona se tlamehang ho tsosoa. Ba bang ba bona ba ke ke ba tsosoa le ka mohla; ba mpa ba se na eona, ke phetho.

¹⁸ Ho joaloka ho sunya hlaku ea mabele mobung, ho sa ka ha . . . Leha e ka khahleha hakaalo, haeba e se na jeme ea bophelo ka ho eona, e ke ke ea tsosoa le ka mohla. Empa jeme ea bophelo e tlameha ho ba teng mono pele.

¹⁹ 'Me ke pheta palenyana ea ntsu eo, e tsamaeang le lithole le litsuanyana hobane e qhotselitsoe e hlahetse mono, feela ha ea ikutloa joaloka litsuanyana tseo. 'Me, u a tseba, ea re ha mammi oa eona a feta a hlab a mokhosi, ea utloa lentsoe leo le e leotsa hamonate, hobane, le hopole, e ne e le ntsu, le ho qaleng. E ne e tlameha ho ikhopola feela, ho fumana sebaka sa eona.

²⁰ Ho joalo le ka molumeli e mong le e mong. Ha u a tsoalloa lefatše lena. U bopiloe ka setšoantšo a Molimo, ho ba Mora oa Molimo. 'Me ha u leloko la serapa sena sa litsuanyana kantle mane. U ntsu.

²¹ 'Me u a tseba, eaba ke tšoarana le "ntsu" eo ka sitoa ho tsetela maoto a ka fatše, ke mpile feela ka . . . Ka ea halelele haholo, 'me ka lebala ther o ka, ka lahlehelo a ke linoutšu le ntho eohle. Ke inyakaletse feela. Empa e ne e le eona, e ne e le mabapi le "ntsu" eo.

²² Joale a Ntsu eo, Molimo! U a tseba, Molimo o bapisa baporofeta ba Oona le lintsu. 'Me O Ipitsa ntsu; Ke Jehova Ntsu, Papa Ntsu.

²³ 'Me lebaka la Oona, ntsu e rurela holimō ho feta nonyana efe e leng teng, hobane e bopiloe e fapan e nonyana efe. Joale, ha e hahe sehlaha sa eona mobung joaloka likhoho le tse joalo, empa e nyolohela holimō ho haha sehlaha sa eona.

²⁴ 'Me taba e 'ngoe, eona, ke nonyana e bopiloeng ka ho ikhetha. Joale haeba e—haeba phakoe, kapa lekhoaba, kapa letlaka, kapa nonyana efe e leka ho e sala morao holimō koana maholimōng, e phatloha; ha e a bopelloa hona. E tlameha joalo, e be motho ea ikhethang ho phahamela holimō mane. Masiba a eona a thata ho feta a nonyana efe.

²⁵ 'Me—'me leihlo la eona le nchocho ho feta la nonyana efe. 'Me ha e phahamela holimō, e bonea hole ho feta. Be, tse ling har'a linonyana tseo, ha li phahamela holimō moo li lōketseng, li foufala sa mankhane. 'Me ho joalo le ka . . . Be, ha ba tlohela sehlomathiso seo, ha ba tsebe letho ka Lona lekhatheng leo. "Matsatsi a mehlolo a fetile," hobaneng? Ha ba Le bone.

²⁶ Empa lintsu li ka phahamela maholimōng, le maholimōng a Maholimō holimō mane. Ho phahamela holimō Mane ho thusang athe ha u bone? Oh, ke thabile haholo ho ba e mong oa bona, ho ba leloko la sehlaha se tletseng bona joale.

²⁷ Ha re phetleng Testamente ea Khale, Buka ea Liproverbia, tse ngotsoeng ke Solomone, e mong oa banna ba bohlale ho fetisa

lefatšeng, kathoko ho Morena Jesu oa rōna. Empa O ne a sa tšoane le Solomone hantle, ka ha Solomone e ne e le monna ea tsoetsoeng ke mosali a emotsoe ke ntate oa lefatše, Davida. Empa Jesu e ne e le Mora ea tsoetsoeng ke movirigo, 'me e se motho ka botlalo; empa E ne e le Molimo, Molimo-Motho, 'me E le ea fetisang motho, E ne e le Motho, kopanya le ho hong. Ua bona? Empa Solomone e le motho ea joaloka ka 'na le uena, 'me o kōpile bohlale ho Molimo, ho laola 'muso oa hae. 'Me a ötliloe neo ea bohlale, monna ea bohlajana ka ho fetisa eo re mo tsebileng kathoko ho Morena oa rōna. O ngotse Liproverbia, 'me ke li hopola li le ntle haholo.

²⁸ 'Me joale re tla phetla Buka ea Liproverbia, khaolo ea 1, 'me, kapa khaolo ea 2, ke rialo, le litemana tse 'maloa tsa pele tsa Liproverbia, oa 2, ho qala ka ea 1. Liproverbia 2, ho qala ka ea 1, Solomone o tsoelapele ho eletsa bara ba hae, "Mora oa ka, ha u fèla u amohela . . ." Ke masoabi.

²⁹ Ke Liproverbia 3:1. Ke masoabi. Ke shebile buka ea ka mona—mona, 'me kea bona ke Liproverbia 3 sebakeng sa 1 kapa 2. Ke masoabi. Liproverbia 3:1.

Mora oa ka, u se ke ua lebala thuto tsa ka; pelō ea hao e ke e boloke likeletso tsa ka:

'Me ho tla . . . u tla ekelletsoa ke tsona litšiu, le lilemo, le ho phela, le khotso.

Molemo le 'nete li se ke tsa khaohana le uena: u ithoalle tsona molaleng oa hao; li ngole matlapeng la pelō ea hao:

Ka hona u tla fumana mohau le hlompheho pel'a Molimo le batho.

U tšepe MORENA ka pelō ea hao eohle; u se ke ua itšepa hlalefo ea hau.

U mo kenyé mererong ea hao eohle, 'me o tla u tsamaisa tseleng tsohle tsa hao.

³⁰ Oh, ke hopola e le Lengolo le khabane ka ho fetisa leo! Joale ke batla ho qotsa therō, ho tsoa ho—ho temana ea 5, *U Se Ke Ua Itšepa Hlalefo Ea Hao*.

³¹ Joale therō ena e—e hlolla e tiile nqa letsatsi leo re phelang ho lona, ka ha ruri kajeno ho toboketsoa thuto le kutloisiso ea rōna ea lintho, letsatsi la—la ho ithuta. Empa mona re fihlela polelo e hlollang ena, joaloka Mangolo a mang, e hahetsoe bolulo ba eona, 'me re tsepile Molimo o tla re bontša bolulo ba eona.

³² Kajeno re romela bana ba rōna sekolong, ho hlomelloa kutloisiso. Hoba ba fete likolo tsa melao ea puo, re ba romela sekolong se phahameng ho hlomelloa kutloisiso le tsebo e holingoana. Hoba ba qete mono, bana ba bang ba lehlohonolo ho kenela k'holoshe, ba ntano feta k'holeshe ho phethela thuto ea bona le ho utloisia tsebo. Etsoe ba hlokoa hoo . . . Khafetsa,

ho itholla mosebetsi, bonnyane u tlameha ho hlomelloa thuto le kutloisiso ea sekolo se phahameng, kapa thuto ea k'holeshe, kapa ntho e joalo.

³³ Athé, Solomone ea bohlale u re boleletse hoo, “ho se itsepise eona, e se be kutloisisong ea rōna; ho se ithute lintho tsena.” Ehlide, re ipotsa lebaka la hae ho riatsø, hobane ka tloaelo kutloisiso ea rōna ea mehla ena ka tloaelo ke bohlale ba motho, e leng bora khahlano le Lentsoe la Molimo. Ke hopola e le seo Solomone eo a lekileng ho se eletsa bara ba hae, e se ho se tsebe ho bala, empa ho se itsepise ka kutloisiso ea bona.

³⁴ ‘Me ke hopola e ka ba keletso e molemo kajeno, ho bolella bara ba rōna le bara ba Molimo, ho re, ho thola thuto ho itoketse, ha ho letho khahlano le eona; empa haeba thuto eo e ema khahlano le Lentsoe la Molimo, u itsepise Lentsoe ‘me u tèle thuto ea hao, ua bona, hobane, Lentsoe. Etsoe thuto ea hao e tla setlela e u fe mosebetsi o motle, mohlomong le seriti pontšeng ea batho ba bahlalefi, empa, hoo ho itoketse ka hohle, koana ho ka u thusa haholo, ho u thusa ka lichelete le ka bophelo ba hao—hao, mohlomong ho u ntlafaletsa bophelo ho feta.

³⁵ Hopola ho le hong, mora oa ka, u tlameha ho shoa. Ho sa tsottelehe mohlaba oa thuto ea hao, u khona ho bokella bohlalefi hakae, u tlameha ho tjamelia lefu, hobane ho ngoliloe, ho thoë, “Batho ba tlameha ho shoa, e ntano ba Kahlolo.” ‘Me Molimo, mohla... Lefu ha le lebe hakaalo, empa Kahlolo e hlahlamang ke karolo e mpe. Joale, u ka shoa, “empa ka morao ho moo ke Kahlolo.” ‘Me Molimo o ke ke oa u botsa bokae ba thuto u e bokeletseng mehleng ea hao mona lefatšeng, u ipokeletse tsebo e kae, haeba u apesitsoe Bachelor of Art, kapa likhau life u ka tšohang u li finyeletse, esita le joaloka moreri. U ke ke ua hlokoa lintho tse joalo.

³⁶ Empa ho tlang ho hlokoa, ho uena, na u entse’ng ka kutloisiso ea Lentsoe la Molimo. Ke eona tlhoko e tla latèla, hobane Seo. Thuto ea hao e ntle, empa Lentsoe la Molimo ke Bophelo. “Lentsoe la Ka ke Bophelo,” ‘me ho Le tseba ke Bophelo. ‘Me Eèna, O itse, “Ho Mo tseba.” Ke Lentsoe. Ka hona u ka Mo tseba ka Lentsoe feela, hobane Ke Lentsoe. U tla Mo tseba joalo feela, ke ka Lentsoe la Hae.

³⁷ Motho a ka nyoloha a re, “*sena ke Molimo*,” kapa “*sane ke Molimo*,” kapa “*sena ke Molimo*,” kapa “*sena se lòkile*,” ‘me “*sane se lòkile*,” empa re khutlela morao Lentsoeng, e leng ’Nete.

³⁸ ‘Me Lentsoe le batla le itšoanel a le—le naleli ea Leboea, ke naleli ea mannete. Ho sa tsottelehe moo lefatše le fofelang teng, naleli eo ea Leboea e hlonngoe setsing le lefatše. U lebahanya kompase ea hao le naleli ea Leboea. E lutse setsing sa lefatše ka mehla. Linaleli tse ling li likoloha le lefatše, empa naleli ea Leboea e tsitsitse.

³⁹ Joale tšupakhutlo ke Moea o Halalelang, 'me (eona) tšiea ea hao—ea hao e tlamellang e tla ba Naleli ea Leboea, ka mehla Moea o Halalelang o tla supa Lentsoe. Moea o Halalelang ha o ka ke ka ua u tataisetsa ho letho ha e se Lentsoe la Molimo. Ka hona e be motho a ka amohela sehlomathiso joang, kanthebo se thulana le Lentsoe, e be o itlaleha a ruile Moea o Halalelang? Moea o Halalelang o tla u supisa hole le ntho eo. Ho hlokoo Moea o Halalelang ho u supisa Lentsoe, hobane Ke Lentsoe. Ke Lentsoe, 'me O ka khona feela... Joaloka—joaloka makenete oa kompase ha o lebahantsoe le Tšiea ea Leboea, e ka hula nqa eo feela. 'Me ha Moea o Halalelang e le Moqali le Mongoli, le mophelisi oa Lentsoe, e be O ka supisa motho ntho e sele joang ntle le Lentsoe?

⁴⁰ Motho ha a itlaleha a na le Moea o Halalelang, a amohela ho khahlano le Lentsoe, e ba supa ba se na Moea o Halalelang oa makhonthe. Ua bona? E ka ba seriti, nke ke ka e hanela, empa ha se—ha se Moea o Halalelang oa Kreste. Joale, u a tseba, hangata, ba bang ba nka meeaa ea ba bang; 'me hoo ho ka supa, ka har'a seholpha sa banna, nthong e itseng, empa e ke ke—e ke ke ea supa ho Kreste. Empa Moea o Halalelang o supa Kreste ka mehla, 'me Kreste ke Lentsoe.

⁴¹ Taba ena re e bona e hlakile haholo Bibeleng. Kapa, 'na ke etsa joalo. Nka tšoha ke fositse, empa, mohopolong oa ka, empa ha ke hopole joalo; hobane, seo, sena: "U se ke ua itšepa hlalefo ea hao ea lintho." Haeba u itšepa hlalefo ea hao, u tlamehile ho fapoha tsela e lōkileng. U ke ke ua itšepisa kutloisiso ea motho e mong, tabeng ea Bophelo. Ho rua Bophelo, u tlameha ho itšepisa ka Lentsoe. Boo ke Bophelo.

⁴² Re bona taba ena, ho tloha tšimolohong. Re e tsebisoa ka ho hlaka hakana, ho tloha tšimolohong, Molimo o neile lelapa la Oona la pele lefatšeng Lentsoe la Oona, ho phela ka lona. Lentsoe la Oona le inotši, ho phela ka lona. Joale, mono ha se ka ho ja lijo, le joalo. Empa ba ne ba tla phela ka Lentsoe la Oona, ka Bosafeleng. 'Me feela ha ba bolokile Lentsoe leo, ba phetse ka Bosafeleng. Empa poleloana ea pele ea Lentsoe leo e tlaitseng, e robile lehlaahlela lohle, eaba morabe oa motho o hohlomela lefung. Ua bona, joale rea elelloa.

⁴³ Eva, ntle le pelaelo e le motho ea bohlale; oa pele ea tsoileng ho Adama hantle, eēna e le—e le mora oa Molimo. 'Me Eva, ruri ka ho lula tulong eo sebe se esong ho fihle, sebe se se na sebaka, o tlameha a ba na tšoere mohopolo o motle oa seo Molimo o nong o le sona. Hobane, thapama e 'ngoe le e 'ngoe, eēna le monna oa hae ba tsamaile tšimong nakong ha ho pholile, mantsiboea, ba qoqa le Molimo lifahleho li talimane. Ha se le e—le bosaoana ho motho ea ka tsamaeang a qoqa le Molimo lifahleho li talimane, letsatsi ka leng, a ntano ipiletsha ho mabaka ho phehisana le ntho e mo tlositseng Lentsoeng la Molimo ka mabaka!

⁴⁴ Le joale re sa ba fumana. Ba huleoa habobebe hole le Lentsoe la Molimo ka mabaka, ka mora ho lula ka pel'a Sefahleho sa Molimo. Ho bona Lentsoe la Molimo le boleloa, Lentsoe la Molimo le bonahatsoa, matahoa le baetsalibe ba arabela aletare ba sokoloha ba etsoa babopuoa ba bacha ho Kreste, batho ba nyehlilengmekhoa ba fetoloa maleiti le majentlelemane; le ho furalla Ntho e bokoang e ba isitseng Bophelong bona, le ho khopamisoa ho sala sehlomathiso sa mofuta morao, ho tuma ho feta kapa—kapa ho imatanya le seo ba se bitsang sehlopha sa maemo a betere.

⁴⁵ Khele, u sehlopheng se fetisang ka khabane se ka fihleloang: bara le barali ba Molimo. Be, ke rata mokhupi oo ho feta ho iteanya le likhosí le mahosana, le sohle se sele. Mphe sehlopha sa batho ba ithobileng bao, le ha koana ba sa khone ho khetha letsoho la bona le letona ho le letšeħali! Ha ba mpa ba itsebelà Molimo, ba Mo rata ba Mo sebeletsa, ke tsona likhalala tsa Leholidmō, ho 'na. E, mongħali!

⁴⁶ Joale, empa Eva re mo khaoletsa a qophelloa habobebe ke Satane, ho fapoha Lentsoe la Molimo, a itšeħa hlalefo ea hae, ka ha Satane a mo taketse ntho eo ho eèna e neng e se kutloisiso ea 'nete ea Molimo. Empa sera sa 'molella taba e sele, Satane, eaba o a e lumela.

⁴⁷ Joale re fumana litholoana tsa taba ena. E hohlomelitse morabe ohle o motho lefung, hobane 'mè oa pele lefatħeng, o kile a itšeħa hlalefo ea hae, khahlano le Lentsoe la Molimo, a lihela morabe ohle oa motho lefung. Joale na le lumela hoo? [Phutheho e re, "Amen."—Mohl.] Leo ke Lentsoe. Be, mosali ka meħla o . . .

⁴⁸ Kereke, ka har'a Bibele, e bapisoa le mosali. 'Me kajeno kereke e ka amohela sehlopha sa litšomo kapa lihlomathiso, ea hohlometsa phutheho eohle karohanong le Molimo. Batho bao ba amohelang lintho tseo, litulong tsa Lentsoe la Molimo, ba itšoanelà le Eva feela. 'Me e entsoe khafetsa le khafetsa, ho fihlela e hohlomelitse moloko ona ohle karohanong le Lentsoe la Molimo.

⁴⁹ 'Me Lentsoe ha le bonahatsoa, Lentsoe le senoloa, ha ba Le amohele, hobane ha ba batle, hobane ba itšeħa hlalefo ea bona. "Kereke ena e ne e hahuoe mona. Ke tulo e ntle. Ke mokhatlo o moholo. Ke setho sa batho ba phahameng. Hobaneng re ke ke ra ba setho sa eona? Ke tla e tšeħa." U se ke ua itšepele hlalefo ea hao, feela itšepele Lentsoe la Morena!

⁵⁰ Joale—joale e lihetse likħala, qetellong, ka lefu la morabe ohle, ka ha ke boletse, ho a itšoanelà le joale, bathong ba bangata ba tsepang hlalefo ea bona, litšomo tsa bona le lihlomathiso, le tse joalo, ba itseka, "Lentsoe la Molimo ha se 'nete e ka botlalo, karolo ea Lona e bululetsoe athe e 'ngoe che." U ka thea tumelo joang Bibeleng, haeba karolo ea Eona e bululetsoe athe karolo e 'ngoe ha e joalo? Haeba e 'ngoe, efela ha qotso e le 'ngoe e le

phoso, ntho eohle e ka fosahala. Ntho eohle e tlameha ho lōka, ho lōka hantle.

⁵¹ 'Me tse ling tsa lilo tsena tse bitsoang joalo, likolo tsa Bibele tse khopameng, tse rutang tsebo ea motho, ho bokeletsa, ba kōpana tulong 'me ba lula lekhotleng la batho, 'me ba re, "Joale shebang, haeba matsatsi a mehlolo a fetile, a felisitse matsatsi a baapostola." 'Me banna ba bangata ba tlas'a bishopo kapa banna ba phahameng, ba lula mono ba re, "Be, hola nka lumellana le eēna feela, ha ho pelaelo nka beoa lenaneng la ho mo hlahlama." Ua bona, ke moo u itsepang hlalefo ea hao, sebakeng sa ho ema Lentsoeng la Molimo ka maoto a mabeli. Ke sona sesosa sa lintho tsena.

⁵² Nakoana e fetileng, motho e mong . . . Mohlang oo ke tsekisoa ka lekhetho. 'Me ba itse ho 'na, ha thoe, "Khele, diteraseti tsa hao ke litseketseke feela, kea kholoa."

⁵³ Ka re, "Ha nka fumana teraseti lekhotleng, e tšoere mohopol o fapaneng, a sa o emele a (ha ke tsotelle na ke mang ea o buang) sa hlahise likakanyo tsa hae ka eona, nka mo lahlela ka ntle ho lekhotla." E, monghali. Leha e thulana le tumelo ea ka, ke batla a hlahose monahano oa hae. Ke mo khethetse hona mono, ho sheba seo a se buang. Empa re fumana seo.

⁵⁴ Lemohang, Jesu o boletse, ho Santa Johanne 10, "Linku tsa Ka li tseba Kolu ea Ka." Kolu, ehlile, ke Lentsoe la Hae, ha A bua. "Linku tsa Ka li tseba Kolu ea Ka. Kolu ea Ka e paketsoe tsona, e le ea 'nete. E nētefalitsoe e le Kolu ea Ka." Joale, joale lemoha, ha li ka ke tsa sala kolu e sele morao. Li ke ke. "Linku tsa Ka li tseba Kolu ea Ka, o sele li ke ke tsa mo latèla." Ka mantsoe a mang, ha li ka ke tsa utloisia kolu ea thutabomolimo e rutang khahlano le Lentsoe. Linku ha li utloisise seo joaloka ntsu, ea maobane bosiu, e sa utloisia ho kakatletsa ha sethole. Ha ba e utloisise, hobane e ne e le ntsu. 'Me ho joalo le ka ngoana Molimo ea tsoetsoeng labobel, ba utloisia lintho tsa Molimo li inotsi.

⁵⁵ Joale motho o re, "Be, joale sheba, u ka etsa *sena*, kea kholoa. Ntho eo, ke lumela e se ka tsela *ena*. Ke lumela matsatsi a mehlolo a fetile. Ha ke lumele eo e le pholiso ea Khalalelo. Ha ke lumele *Sena*." Joale Mokreste oa 'nete ea tsoetsoeng labobel, e ke ke ea ema litsebeng tsa hae, ha a e utloisise ho hang. 'Me ho tla joang ha monna ea lumelang Molimo, a ka bala Bibele a bona hobane Ke eēna maobane, kajeno, le ka mehla, 'me a hla a amohela ntho e kang eo, ha ke e utloisise.

Ka hona ha ba itšepe hlalefo ea bona.

⁵⁶ Joaloka e—e lesea. Ha u nka lesea, e re le tsoaloe le itšetlehe sefubeng sa 'mè oa hae, le anye ho eēna, lebese le futhumetseng, le tšetlehe hlohoana ea lona sefubeng sa hae, leha le holile lihora tse 'maloa feela. Letsatsi kapa a mabeli ho tloha moo, mo tlose ho 'mè oa lona o antše letsoele la 'mè o sele, o tla rahaka a hlabe moea ka lirethe ka lerata. Ha se 'm'a lona. Ua bona, o se a anngoe

ke ho hong, ka ha e le karolo ea 'mè enoa, koana tlhaho e mo hlometse ho tseba mama oa hae.

⁵⁷ 'Me efèla ha tlhaho e hlometse lesea ho tseba 'm'a lona, moo le tsoetsoeng teng, hakakang e hlometse mora oa Molimo ea tsoetsoeng ke Moea oa Molimo. O tseba Mama oa hae! O a tseba, hobane o tsoetsoe ke Lentsoe, 'me o utloisia Lentsoe. Ha u 'meha tulong e mohlololo, o hlile o tsoile—o tsoile malulong, o tla phorotseha mono ka potlako ea bokhoni ba hae. Hobane o se a, ha a itšepe...

Motho o re, "Joale bea butle, moratuoa, enoa ke mama oa hao joale."

⁵⁸ Ha se mama oa hae, hobane o hlomeletsoe ho itseba e le karolo ea 'mè enoa. Ke 'mè oa hae enoa, ha ho mang ea ka tlatsang litulo tsa hae. O tseba 'mè oa hae ka sebele. Lemoha, na ho joang, ho hlile ho joalo. Molimo o entse tsohle ka mofuta oa tsona.

⁵⁹ Makhomomo ka mofuta oa ona. Khafetsa ha ho thijoa likhomo, re ne re hlahlela mehlape eohle ea makhomomo le manamane, ke ipotsa ka moo li tsebang mama oa tsona. Joale, tsona, li theoha li tsoa lithabeng, makhomomo a tsoakane ka bottlalo. E—e—e khomo e nang le namane, namane e ka anya 'mè e mong, ha e lapile; empa ha re li emisa, kantle makbulong, mama eo o phollesta seholopha seo sa lithole le manamane ho fihlela a fumane ea hae, 'me namane e mathela 'mè oa eona. E tseba sello se ikhethang seo le molumaelo oa sona. 'Me se lumaela ho hooeletsa namane eo, le bommè ba bang ba lumaela ho fihlela u sa ikutloe u nahana, empa namane eo e tla khetholla pitso e ikhethang eo ea 'm'a eona, hobane ke karolo ea 'mè.

⁶⁰ 'Me Mokreste ea tsoetsoeng labobelci Leholidong, ke karolo ea Lentsoe lena. Hantle. A ke ke a sala mama o sele morao. Ke karolo ea Lentsoe. O tiisetza Lentsoe. "E ka re ha terompeta e butšoela molumo o sa khethoeng, ea ka itokisetsang ntoa ke mang?" Pauluse o boletse. O tseba molumo oa Lentsoe. Lemohang ka moo—ka moo e leng kateng, letsoho la Molimo le laotsoeng le ba sala morao ka mehla. O itseba a reriloe, o ne a le ka har'a 'Nete ea Evangel. O itsibile a tsoetsoe ke Moea oa Molimo. O tseba Moea oa Molimo o ke ke oa hanela Lentsoe la Molimo, ka hona o sele a ke ke a mo latèla. Joale lemohang ka moo...

⁶¹ Ke ne ke shebile morao mona noutung eo ke e ngotseng mona. Ke—ke fetile ho eona, ka tsoatsoa ke bone palo ea Lengolo, ka hopola ho khutlela ho eona hape. Lemohang linku tsa Oona tse reriloeng pele li a Mo latèla, hantle matsatsing a baithuti ba baholo ba thutamolimo ho fetisa bao re kileng ra ba fumana. Ba tsoa hantle, hobane ba Mo tsebile. Ba tsebile seo Lentsoe le se tšepeisitseng letsatsi leo. Ba tsebile seo Messia a beng a tšoana

le sona mohla A tlileng. 'Me Simone Petrose o tlide ho Eèna, mohlang o e le "Simone" feela.

⁶² 'Me Andreease a lekile ho 'molella ka eona. "Monna enoa ke Messia." Be, Simone, ehlile, a batla a le hlooho e thata, 'me a sa batle ho ea.

⁶³ Empa ha a fihla ka pel'a Sefahleho sa Jesu, ea re ha Jesu a itse, "Lebitso la hao u Simone, 'me u mora oa Jonase." Joale re tseba Jesu a boleletse baapostola ba Hae ha thoe O ba tsebile, le eèna, "pele ho motheo oa lefatše." Bao e ne e le litholoana tsa mehopolo ea Oona. Ka baka leo, e re ka ha peō eo e robetse ka ho eèna, 'me o tsebile Lentsoe le boletse 'me le tšepisitse hoba Messia e tla ba moporofeta. 'Me hoba a bone seo, eaba o getile ka ho tšoasa lihlapi. A tseba hobane o tla tèla matlooa a hae, ka ha a tla tloha ho ea—ea ba motšoasi oa batho. Hoba . . .

⁶⁴ Joale, mono ke ha ho eme ba bang, ba bone ketso eona eo, 'me ba e hlophissa e le "moea o mobe." E ne e le baithuti ba thutabomolimo, hoba e ne e sa latsoehe joaloka thutabomolimo ea bona. 'Me ba e hanetse, hobane ba itšepisitse hlalefo ea bona, ho latèla lingaka tsa bona; holim'a, Jesu Kreste a tlide phethahatsong ea Lentsoe la pallo, 'me ba foufetse haholo ho e bona. Ba itšepisa seo baprista ba se boletseng, le holim'a seo kereke e se boletseng, sebakeng sa holim'a seo Molimo o se boletseng.

⁶⁵ Joale Jesu o ba khalemme ke hona. O itse, "Batlisisang Mangolo, hoba ho Oona le ipolela le na le Bophelo ba Kamehla. Athe ke Oona a Mpakang. Mangolo ana ao ke le kōpang ho batlisisa, a le borella na Ke mang."

⁶⁶ Empa ba sitiloe ho itšetleha nqa seo Lentsoe le se buileng, ba mpa ba itšepisa seo hlalefo ea bona e leng sona. Ba itšepisa hlalefo ea bona. 'Me Lengolo le re borella ba na ba koahetsoe ke lesira. Ba foufalitsoe ke lesira la thutabomolimo ea bona.

U re, "Moena Branham, athe u lebisa kae?"

⁶⁷ Ke lebisa mona. E boela e hlaha bocha, ho fihlela, banna le basali le batho ba itšepela kereke e itseng eo ba ngolisitseng ho eona e le setho sa eona, ho sa tsotelehe seo Lentsoe la Molimo le se bolelang ka eona. Ba tsoelapele hantle ka eona, ho itšepa hlalefo ea bona, le ho hlokomoloha Lentsoe la Molimo, e ka holane (le ka mohla) ha Le eso ngoloe. Ke peō e sa phelisoang ea bophelo ba motho. E tšoere bophelo ba tlhaho, feela ha e na bophelo ba moea bo ka phelisoang. Lesira le koahetse sefahleho sa bona.

⁶⁸ Joale lemoha, ke ha ba fupile mehopolo ea bona ka seo Molimo o tlamehang ho ba sona, ba fupile mehopolo ea bona ea seo Messia a tlamehang ho ba sona! Joale, ua bona, ke ha ba fupile hlalefo ea bona seo A tlang ho ba sona. Ntle le pelaelo moprista e moholo o itse, "Baprista bohole ba tlas'a ka, joale Messia mohla a tlang . . . Mona re hahile tempele e khôlô. Re entse sena sohle.

⁶⁸ 'Me Bibebe e boletse, 'O tla fihla tempeleng ea Oona ka potlako,' le lintho tsena tsohle. Mohla A etsang hoo, Messia o tla nyolohela koano hantle a Imatahanye le rōna, ho re, 'Ke 'na Messia. Ke fihlile. Ke Messia eo e sa le le 'matla.''' Be, mohla A tlileng, O tlide ka mokhoa o fapaneng le oo ba o hopotseng, ha ba Mo lemoha. Ha ba Mo tseba na e ne e le Mang. Empa oa Hae . . .

⁶⁹ Oh, haeba . . . ho ka thoeng holane ha nyoloha moikaketsi oa mofuta ea itseng, "Ke 'na Messia. Ke Ngaka *Sekete-le-sekete*"? Ba be ba ka e amohela.

⁷⁰ Empa ha u fihla ho Monna eo motheo oa tsoalo ea Hae o rothofetseng, a sa hlomeloa thuto ea sekolo sefe A kileng a se kena, ho ithuta, A sa hlomeloa thuto ea seminari, a sa hlomeloa setlankana sa bolekane; empa E ne e le botoloki ba Lentsoe la Molimo, le bonahalitsoeng. "Eona mesebetsi eo, eo Ke e etsang, e le bolella na Ke Mang. E ka re ha Ke sa etse mesebetsi eo Ke baletsoeng ho e etsa, le se ke la lumela ho 'Na.'"

⁷¹ 'Me na re ke ke ra e thaleha letsatsing lee? Mohla Moea o Halalelang a tlileng, ba batla ho o thaleha mongoaheng o mong o sele, mohla A fihlileng ka khato le liponahatso tsa matla a Hae a Bophelo Bosafeleng, batho ba batla ho e bitsolla e—e "bohlanya bo hlahafetseng." Hobaneng? Ba itsepisitse hlalefo ea bona, 'me e seng Lentsoe la Morena. Lea e tseba ke 'nete.

⁷² Boitsebiso, ho re Molimo, botoloki ba Oona ke ponahatso ea tsepiso.

⁷³ Mohlomong nka e bua, ka e hlakisa hanyenyane ho feta. Molimo ha o bua Lentsoe, ha O hloke monna ofe kapa mosali ofe, kapa mang feela, ho bolela seo E se lekanyang. Haeba . . . Be, u re, "Molimo o no o bolela sena." Molimo o bolela hantle feela seo O bolelang O se lekanya. Ua bona?

⁷⁴ Joale e be o toloka Lentsoe la Oona ka Seqo joang? Ka ho Le phethahatsa. Bibebe e boletse, "Moroetsana o tla emola," o entse hoo. Hoo ha ho hloke toloko ea letho. Molimo o boletse, "Leseli le be teng," 'me le hlahile. Ha e hloke toloko ea letho.

⁷⁵ Molimo o boletse, hape, ha thoe matsatsing ana a qetello, "O tla tsela nama eohle ka Moea oa Oona," 'me O e entse. Ha e hloke toloko ea letho. E hloka kamohelo, motho ea amohelang seo Molimo o se entseng. Ha e hloke toloko. Molimo o toloka Lentsoe la Oona ka Seqo. Molimo o tsepisitse lintho tseo re li bonang, letsatsi le letsatsi, ha thoe O tla e phethisa letsatsing la ho qetela.

⁷⁶ Batho kajeno, ho tšoana le mohlang oo, ba itšepa kutloisiso ea bona. "Molisa oa ka o e bitsa 'bohlanya.'" Empa Bibebe e boletse e tla hlaha. U tla itsepisa hlalefo ea mang?

⁷⁷ Bibebe e tsepisitse matsatsing a qetelo, ho thoe, "Mongoaha oa Kereke ea Laodisea o tla rua haholo, 'me o suffic- . . . kapa ba none pelō bobona, 'Ke morui. Ha ke hloke letho. Ke lutse

joaloka mofumahali.”” ‘Me ke morui. ‘Me O itse, “Athe ha u tsebe u malimabe.” Joale mono ke mongoaha oa kereke eohle, kereke! “Ho kereke ea Laodisea, u feela, sefolu, mofutsana, malibame, athe ha u tsebe.” U lutse har’ a maruo a hae, likete atisa ha leshome atisa ka likete ha leshome, le litho tse likete, leruo la lefatše le matsohong a hae, ho batla ho le joalo. Ha u e kopanya eohle ‘moho, ho fihlela joale, kereke ea Katolike le Maprotestanta, ‘moho, li teana ‘moho, ba tšoere leruo la lefatše.

⁷⁸ Re chonne sechabeng sena, ho batla ho le joalo. Re alima lekhetho le tlang ho lefshoa lilemong tse mashome a mane ho tloha joale, ha ba mpolella, ba boletse joalo ho *Life Line*. Makhetho, rea sebelisa hona joale, a tlang ho lefshoa lilemong tse mashome a mane ho tloha joale. Setloholo sa ka, ha Jesu a ka lieha, makhetho a tlang ho a lefa mohla a leng mashome a mane, rea sebelisa hona joale. Re romela lithuso tsa kantle, athe Maindia a rōna le lintho a bolaoa ke tlala; ho leka ho reka setsoalle. Ha u reke setsoalle. Ha u reke motsoalle. Che, empa ke seo re se etsang. Re hlophisiso joalo, ho lefisa batho lekhetho la sohle seo ba se khonang, lekhetho, lekhetho, lekhetho. ‘Me molato oa rōna oa ntoa o tla tsoella e—e makholo a lilemo, kea kholoa, re o etselitsoe ke boralipolotiki. ‘Me joale ha rea tlameha. Ha ho lebaka la hore re be joalo.

⁷⁹ Empa likereke, ka bo tsona, li ruile. “Leruo lohle la lefatše” Bibebe e rialo, “le batla le tšoeroe ke kereke ea Katolike.” Lebaka leo Rashia e lelekileng, lebaka leo Rashia e khaotseng. Ke oona motheo oa bokomonisi, hobane kereke e rutile ho hong, e batla e sa fapania le lefatše lohle.

⁸⁰ Mohla re nyolohetseng koana Finland, moshanyana eo o ile a tsosoa bafung. Masole ao a Marashia a ne a eme pasha, ‘me ba itse, “Re tla amohela Molimo o tsosang bafu.”

⁸¹ Re bopile mekhatlo ea malumeli, le likolo le—le meaho, le ho hlolleha ho etsa seo Jesu a re laetseng sona, e ne e le ho “Bolela Evangel.” Re lekile ho ruta lefatše. Ha A eso re, “Le rute lefatše thuto; ea rutehileng o tla bolokeha.” U tšoanelia ho tsoaloa labobeli, ho tlatsoa ke Moea. Lebaka leo re hlollehileng habohloko hakana, hohle. Ua bona, re ruile, re tšoere hoo.

⁸² Joale ho tla etsahalang? ‘Me e tla re ha kereke ena, K’hansele ea Likereke tsa Lefatše, e kōpana, na ha le bone ea tlang ho etella pele? Na ha le bone Mamethodise le Mapresbeteriene ho utloisia hoo, lōna kaofela, ho fihla ho Mapentekosta? Le ipolela le sa kene kahare. Le tla kena kapa le qhaqhe mokhatlo oa bolumeli. Le tšoanelia ho etsa hona kapa hoane. E ka pel’ a lōna hantle, le tlameha ho e phethisa. Ke khatello ka sheshe, letšoao la sebata. ‘Me ke eona, hantle. Bolumeli bo hlophiloeng ka botlalo (nka e kholosa ka Bibebe) hore ke letšoao la sebata. “Ke sehlola; se nang le barali ba liotsoa.” ‘Me rea tseba hoo ke ‘Nete. Borapeli bo hlophiloeng, e khahlano le Lentsoe, ‘me melaoana

ea eona e antikreste. Ha se sohle se leng antikreste ka mono; empa ka melaoana ea eona, tsamaiso kea eona e antikreste, hobane e khahlano le Lentsoe la Molimo. Tsamaiso ka 'ngoe e hlophisisoeng e joalo.

⁸³ Ke lōna bao, ua bona, 'me u itsepisa ka ea motho e mong hlal-...hlalefo ea bona, sebakeng sa ho itsepisa kutloisiso ea Molimo, ka seo Molimo o se boletseng ka eona. Lebaka leo e leng phoso. Bashanyana ba thotseng thuto e ntle ba tloha ba ea fehlelloa liseminaring, ba tloha ho ea likolong tsena tsa Bibele, tse bitsoang joalo. 'Me mohlomong pitso ea Molimo e lutse—lutse pelōng ea bona. 'Me ba tsoela koo 'me ba topetsoe mohopolo o le mong hakana, ho thoe, "Sekete-kete o e buile, Bishopo Sekete-kete. Enoa o e buile. Eane o e buile. Lekhotla la banna le lumellane, e tlameha ho ba tjena."

⁸⁴ Se tsotelle seo mang a se buang! Jesu o boletse, "Lentsoe la motho e be leshano, athe la Ka ke 'Nete. Ho sa tsotelehe ke la mang, la Ka e be 'Nete!"

⁸⁵ Joale re tseba 'Nete joang? Bibele ha e tlaleha ntho e tla hlaha, hore ntho eo e tla hlaha, 'me e etsahala ka tsela eo.

⁸⁶ Joale, Bibele e boletse, "Ho eèna ho fihletsoe e—e leruo la lefatše; gauta, silifera."

⁸⁷ Joale haeba re behiloe sekaleng sa gauta, 'me re chonne, joale e be ho tla etsahalang? Ho tla etsahalang? Ua tseba, barui ba sechaba sena, lifektri tse khōlō, le banna ba wiski le banna ba koae, le bao ba joalo, ba ke ke ba lumella ho fetoloa ha chelete, ntho eo re tla tlameha ho e etsa ke ho e alima. 'Me re ka e alima nqa e le 'ngoe feela. 'Me ha re etsa joalo, re rekisa ka boholo ba rōna. Ke hantle. Ebe le tla etsa'ng? Le baruuoa ba eona, tsamaiso eo. Ha ho letho le sele, leo le ka le etsang.

⁸⁸ Oh, lōna batho, le se nahane ke... Le ka re kea hlanya. Empa mohla lentsoe la ka le robetseng ka khutso lefung, liteipi tsena li letsoa, 'me le tla elelloa hoba seo ke se buang se etsahetse. Nka ba lesaoana le fetisang la motho ho emela seo ke se emetseng, le ho ema khahlano le sena, e ka be eba ke—ke e ka be e ba—e ka ba ke khahlano le Molimo, e ka ba ke khahlano le sohle seo e leng Molimo, haeba (holane ka) mohopolo oa ka le pitso li fositse. Taba eo e ka ba khahlano le Molimo. Empa ke emetse sena ka ha ke se bona Lentsoeng mona. Ke Lentsoe la Molimo. Ke ntano se bona se nètefatsoa, se kholisoa e le 'nete. Ke bona botoloki boo Molimo o bo etssetsang Lentsoe la Oona. Botoloki ba Molimo ka Seqo ba Lentsoe la Oona ke tsela eo O Le nètefatsang le ho Le nèpahatsa.

⁸⁹ Hobaneng Bafarisi bana ba ne ba foufetse? Ba foufalitsoe ke eng hakana? Hobane ba hanne ho amohela tšenolo kapa nètefatso ea Lentsoe.

⁹⁰ 'Me ke ka hona likereke kajeno li foufetseng, hobane ha li amohele tšenolo e ntseng e nètefatitsoa. Haeba Lentsoe le rialo, 'me e senoloa, 'me e kholisoa, le joale ha ba E amohele.

⁹¹ Ka lona lebaka leo Bajuda bana, Bajuda ho fihlela letsatsi lena, ba ke ke ba khona. U ke ke ua qoqa le bona ka Kreste, hobane lesira le khurumelitse sefahleho sa bona, ba foufetse.

⁹² 'Me kereke, u ke ke ua qoqa le bona ka Evangelie e tletseng le ka matla a Molimo, hobane molimo oa lefatše lena o ba foufalelitse linnete tsa Molimo, 'me ba itšepe hlalefo ea bona. Basali ba kenang kerekeng ba poma moriri oa bona, hobane balisa ba ba bolella, "Oh, hoo ho itoketse. Monna eo o a hlanya." Empa Bibele e 'moletse a sitiloe ha a etsa joalo, Molimo o hanne ho arabela thapelo ea hae. 'Me ba bang ba basali bao ekelitse lihlong tse ling, 'me ba leka ho iketsa moreri, 'me o e menahantse habeli. Bibele e 'moletse a sa tlameha ho etsa hoo, le letho la eona. Empa kereke ea mokhatlo e a e amohela, e a mo tlotsa e mo romela kantle. Ba itšepisa hlalefo ea bona!

⁹³ Lentsoe le le leng la Molimo le tlaitseng, kapa le sokantsoeng, kapa Le sa amoheloe, le khaola Lehlaahlela lohle. "Motho a ke ke a phela ke bohobe feela, empa le ke Lentsoe le leng le le leng le tsang molomong oa Molimo."

⁹⁴ Khele hobaneng, basali, le nkutloa ke rera khahlano le lintho tsena, ka ho tena lishotso, ho tlola liferefere, le—le mekhabiso ena ea moriri o pongoang, le nyee eo eohle, 'me selemo ka seng ha ke boea le sa ntse tiiselitse maemo ao? Ke hobane le itševisa hlalefo ea lōna sebakeng sa Lentsoe la Morena.

⁹⁵ 'Me, balisa, hobaneng u sa hloekise kereke ea hao? Hobane o thohothela sehlomathiso sa bolumeli ba hao sebakeng sa Lentsoe la Morena. Hantle. U se ke ua itšepe hlalefo ea hao. Be, u se ke ua itšepe hlalefo ea hao, empa Lentsoe la Morena.

⁹⁶ Ba hanne ho e amohela, hobane ba hanne ho amohela nètefatso. Jesu o tlide ka—ka Evangelie, hantle ka moo A boletseng A tla khutla. Esita le hangata . . .

⁹⁷ Johanne o ne a batla a ferakane mohla a na a lahleloa teronkong, 'me a—'me a fihla tlase . . . 'Me o ne a rerile "Ho Khutla ha Messia, Eo seoloso se leng letsohong la Hae; O tla fiela seotlo sa Hae ruri, mooko a o chese ka mollo o sa timeng, koro a bokelle molikong." Moea oa Molimo o a hlahisa, o phorosela ho eèna joaloka e—joaloka e seliba. 'Me eare ha ba bona Jesu a fihla, Mothaka ea monyenyané, ea ithobileng, ea ikokobelitseng a batla sutuletsoa koana le koana, ho mathela mona, ho boloka bophelo ba Hae, le ka mona. Khele, ke ha ba sa . . .

⁹⁸ Johanne ha a khona ho e utloisia, eaba o romela barutuo ba hae ba bang ho botsa Jesu haeba E ne e le Eèna. Hlomphollo e ka kang ho Jesu! Hoba moporofeta eo a eme mono metsing ao, ka Lentsoe la Molimo, ho re, "Ke Mo tsebile, hoba ke bone e—e Moea o Halalelang, e ka leeba, Molimo o theoha Leholimõng e ka

leeba le kenang ho Eèna, eaba ke utloa Puo e tsoa Leholumong, e re, ‘Enoa ke Mora oa Ka ea ratoang,’” e be Johanne o re, “E-eang, le Mo botse haeba ehlile e le Eèna Eo, kapa—kapa—kapa, ‘Na re sa batla e mong?’”

⁹⁹ Joale Jesu ha a mo romella buka ea boitšoaro teronkong, kapa kereke efe ho ingolisa ho eona. Empa O itse, “Lulang nakoana le shebe se etsahalang, le tlohe le bontše Johanne tsee le li boneng ‘me li etsoa,” hobane mesebetsi ea Hae eo A e entseng e Mo tsebahalitse e le Messia, Mora Molimo. “Ho lehlohonolo ea sa tl’o khoptjoa ho ‘Na.”

¹⁰⁰ Bongata bo boholo bo a khoptjoa. Bongata bo boholo ba batho bo khoptjoa ke Lentsoe la Molimo habobebe. E—e khahlano, ba batla ho itšepa hlalefo ea bona. Ha ba batle ho nka Lentsoe la Morena. ‘Me ba tlameha ho nka tsela eo—eo ba rutiloeng ho e nka.’ Me tsela eo ba e rutiloeng, kereke ea bona itšepisa eona. Ho sa tsottelehe le haeba Molimo o tšepisitse O tla—O tla nesa pula, ho hlahisa pula hoseng, ‘me kereke e itse “ke bosaoana,” ba tla lumela kereke sebakeng sa Molimo. Hobane hobaneng? Ba tsoetsoe ke kereke.

¹⁰¹ Empa monna ea tsoetsoeng ke Molimo, ke oa Peō ea Molimo. ‘Me peō ea Molimo ke Lentsoe la Molimo, ‘me o phela ka Hoo feela. Hoo ke Bophelo ba hae.

¹⁰² Joale, ba ile ba itšepa hlalefo ea bona, feela ba sa batle ho itšepisa ka Lentsoe la Molimo. Ba tsebile hantle ho feta. E ne e le ka har’la Lengolo. Ba e bitsitse “moea o mobe,” Monna eo. Hobane hobaneng? Baprista ba bona ba boletse, “Mang le mang ea mamelang Monna enaoa a rera, ba tla ntšoa sinagogeng.”

¹⁰³ Mohla monna oa sefov a na a folisoa, ke Jesu. Esita le batsoali ba hae, le ha ba thabetse pholiso, feela ba tšabile ho paka Jesu ea entseng hoo. Yaa.

O itse—o itse, “Enoa ke mora oa hao na?”

Ha thoe, “E.”

Ha thoe, “Ke mang ea mo phelisitseng?”

¹⁰⁴ Ha thoe, “Ha ke—ke tsebe.” Ha thoe, “O lilemong, botsang eèna, a ka ipuella.”

¹⁰⁵ Hobane, ho builoe, ho re, “Motho ofe ea itšepisang ka Eèna, kutloisiso ea Kreste,” sebakeng sa kutloisiso ea bona, “o tla khaoloa kerekeng.” Na hoo ha ho tšoane hantle feela? Ke le botsa potso e iphotlileng. [Phutheho e re, “Amen.”—Mong.] Ke hantle. E ile ea hula hona hoo. Ho sa tsottelehe seo Molimo o se etsang, e tlameha ho sala hlalefo ea bona morao, e seng seo Molimo o se nètfatsang e le ’Nete. Joale, athe monna eo o na tšoere karabo, le hona.

O itse, “U folisitsoe ke mang?”

O itse, “Ke e mong ea bitsoang Jesu oa Nazaretha.”

Ha thoe, “Ke moetsalibe. Ha re tsebe moo A tsoang teng.”

¹⁰⁶ A re, “Joale na ha se mohlolo. Lōna le leng baetapele ba hora ena. ’Me Monna ke enoa o ntutubolotse mahlo, ha eso etsoe esale le qalong lefatše, koana le re ha le tsebe moo A tsoang teng.” Oh, banna!

¹⁰⁷ Hobaneng? Ba ne ba itšepisitse kutloisisong ea bona sebakeng sa Lentsoe la Morena. Hobane Esaia o boletse, “Lifofu li tla bona, ba shoeleng litho ba thale joaloka khama, mahoatata a fupuhe ka nyakallo.” Empa ua bona ba ile ba itšepa hlalefo ea bona, e seng Lentsoe; tsamaiso ea bona eo ba e ralileng.

¹⁰⁸ Joale lemohang likereke tsa kajeno li etsa ka ho tšoana. Ba bopile morabe o moholohali oa kutloisiso ea tonana, litsamaisong tsa malumeli a bona. Hoo, ba tšoere kutloisiso e khōlōhali, ha ba batle ha mang a tšoenyana le eona, ho se kene motho haese setho sa sehlopha seo.

¹⁰⁹ Le se ke la mpolella; ke lula Tucson, Arizona. Ke faletse tlase mono lilemo tse tharō tse fetileng, ke teane le k’hansele ea likereke, le ho re, “Ha kea tla ho qala kereke. Ke tlie ho kenela bolekane le lōna. Ke tlie ho le thusa. Ke tsoa ka boromuo, moevangeli, sohle seo ke se etsang.”

Ba itse, “Ana u tlie koano ho qala kereke?”

¹¹⁰ Ka re, “Che, monghali. Ke tlie koano . . . Haeba ke batla kereke, ke na le e ’ngoe Indiana.” Ka re, “Ke tlie koano hoba Morena o ntlisitse koano ka pono. Ke sa tla lula nakoana joale, haese ha A nkisa nqa e ’ngoe, empa ha kea tlela ho qala kereke le ka mohla. Ke tlie ho thusa lōna baena.”

¹¹¹ Ke lilemo tse tharo tse fetileng. Ha ke eso mengoe tulong. Hobaneng? Hobane ba ile ba kōpana ka morao ho mono, ’me ha thoe, monna ofe ea ntlhomang sefaleng sa bona, ba tla leleka moreri eo. Ua bona? Hobaneng? Ho itšepa hlalefo ea bona! Ruri, ntho eo e reiloeng joalo, ba bopa kutloisiso ea bona ea tonana.

¹¹² Ha e se ha u ka ngola lebitso la hao bukeng ea bona, u tla . . . u lahlehile. Moreri o mpoleletse eona. “Oh,” u re, “e ne e le moshaqane oa mofuta.” E ne e le Mopentekosta.

¹¹³ ’Na le Jack Moore re lutse mono re mo mametse koana Dallas, Texas. O ipoletse e ne e le, “Ho tlameha ho hlakola monna bukeng.”

Ka re, “Hobaneng?”

“Hobane a qoqile le uena.”

Ka re, “Be, le hlakole.”

A re, “Be, o lahlehile ke hona.”

Ka re, “Lahleh?”

“Khеле,” a re, “haeba lebitso la hae le sa ngoloa ho eona!”

¹¹⁴ Ka re, “U ipitsa mookameli oa selika athe u lumela seo?”

A re, “Eo ke ‘nete.”

¹¹⁵ Ka re, “Beha mohala fatše, mohlophehi. Uena, uena . . . Oo ha se mohau oa Molimo, ntho eo—eo, ua bona.”

¹¹⁶ “Hobane ka Moea o le mong re kolobeletsoa bohle ‘Meleng o le mong, ’me re fetoha litho tsa ‘Mele oo.’ Ho sa tsotelehe na u qhoaetse seteketana sefe, ha e amane le eona ka letho. Ruri u Mokreste ka Tsoalo. Ke eona feelsa tsela, tsela e le ‘ngoe u ka bang joalo; ha se ka ho ngolisa, ha se ka lihlomathiso, ha se ka ho chocha *sena*, kapa ho thotokisa *sena*, kapa ntho efe e sele, le ha e le ka thuto, thutabomolimo. U Mokreste ha u tsoetsoe labobelis, ‘me u ke ke ua tsoaloa bocha ha e se ha u khethetsoe ho tsoaloa bocha. “Hoba ho se ea ka tlango ho ‘Na a sa huloe ke Ntate oa Ka pele, ‘me bohile bao Ntate oa Ka a ‘Neileng bona ba tla tla.” Amen. “Ke tla ba tsosa letsatsing la bofelo.”

¹¹⁷ Likolo tsena tsa rōna tse bitsoang tsa Bibele, li tla bolela, li tla itsepela thupello ea bona. Oh, banna. Bao, ho sa tsotelehe seo Lentsoe le se bolelang, ba ka e hhalosa e hlakile haholo, oh, ho bona, ho e betlela tumelo ea bona, le hore mofuta oa bona o e lumele, ho re, “Matsatsi a mehlolo a fetile. Ha ho ntho e kang moporofeta, baporofeta, baapostola. Ha ho ntho e joaloka lineo tsa pholiso, le joalo-joalo. Ntho eohle e feletse litšiung tsa Bibele morao koana.” Ba ka etsa hore ba e lumele ka bobona.

¹¹⁸ Ua tseba, Bibele e boletse, “U ka lumela leshano ua ahloloa ka lona.” Ua bona, ke ‘Nete e tiileng. Ba bopa, ho sa tsotelehe seo Lentsoe la Molimo le se buang, ba ka itsepela hlalefo ea bona. Bao, ba itsepela eona, ba e lumela, ba e hopola e le ‘Nete. U ka lula u lumela leshano, hape le hape le hape, ho fihlela e le ‘Nete ho uena. Ke hantle.

¹¹⁹ Empa re tseba kang ha e le ‘Nete kapa che? Molimo o e kholisa e le ‘Nete, hoba e Lentsoeng la Oona ‘me O a Le nètefatsa. O Le toloka ka Sebele sa Hae.

¹²⁰ Ba e sebetsa joang, ho finyella sena? Ba e phethisa ka borutehi ba bona, thuto ea bona, ea likutloisiso tsa bona tsa—tsa ligarata tsa bongaka, le linyee tse joalo, tseo ba li tsoereng li tsoa seminaring ea mofuta le ho ithuta linyee tsena.

¹²¹ Empa shebang, metsoalle, mame lang. Ka Bibeleng ha ho moo re kōptjoang ho utloisia. Ha re kōptjoe ho Le utloisia. Re kōptjoe ho Le lumela. Ho Le lumela ka eng? Ka tumelo. Haeba u Le utloisia, hoo ho hlala tumelo. U ke ke ua Le utloisia, empa u a Le lumela le ha ho le joalo. Holane nka utloisia Molimo, nka be ke sa tlamehe ho lumela Molimo. Ha ke utloisise Molimo. Ha ho motho ea utloisisang Molimo. Ha ke utloisise Lentsoe la Molimo, empa kea Le amohela. Kea Le lumela. Ha ke kōptjoe ho Le utloisia.

¹²² Ha kea khona, ha kea titimela seminaring efe le kutloisisong e khōlōhali ena eohle ea tsebo ea motho tabeng Eo. Ke tseba Bibele e bolela Hoo feelsa, “Jesu Kreste maobane, kajeno, le ka

mehla,” ’me ke Mo batla sekhutlong seo. Kea tseba O tšepisitse seo A tlang ho se etsa letsatsing lena, ke shebile Eèna ho e phethisa ’me O a e phethisa. Ke hantle. O tšepisitse mohau, ke o batlile ’me ke o amohetse. O tšepisitse pholiso, kea e lumela ke e amohetse, ke e fumane.

¹²³ Joale ha ke batle ho minya nako ea lōna e ngata, empa ke batla ho botsa ntho e le ’ngoe haeba le ka ’mamella motsotso, ho nahana ka bao ba sa kang ba itšepa hlalefo ea bona; litšoantši tsa Bibele, tse ’maloa feela, tse sa kang tsa itšepa hlalefo ea bona, ho sa tsotehe hlalefo ea mongoaha oa bona.

¹²⁴ Ha re thonyeng, ho tea mohlala, Nohe. Nohe o phetse letsatsing le leholo la patlisiso e khōlō ea mahlale. Matsatsing a Nohe, mohlomong ba hahile lipiramide, tseo ba ka sitoang ho li hlahisa bocha. Joale ha re ka ke ra e khona ka letho, ha ho letho le ka phahamisetsang lipitla tseo holimō mono. Ba ne ba sa tl’o khona, kajeno. Matsatsing ao, ba ne ba tšoere k’hemikale ea mofuta ba e tšoaka le daye ba ntlaufatse liaparo li shebehe li le ncha ho fihlela kajeno. Ba tšoere mokelikeli o nokang setopo; rōna re ka sitoa, kajeno, le holane re tlamehile. Re se . . . re lahlehetsoe ke bonono boo ba bo tonana. Letsatsing leo a phetseng ho lona, mongoaheng o bohlale oa saense.

¹²⁵ Jesu o ile a lebisa ho eona, ha thoe mongoaha oa mokhaloo oo o tla ipheta pele A khutla, “Hoba joaloka matsatsing a Nohe” Joale le tla lumela, hoo, ha ke re? [Phutheho e re, “Amen.”—Mohl.] Na le lumela Jesu a boletse taba eo? [“Amen.”] Na le lumela re khutletse mongoaheng oo? [“Amen.”] Joale mono ke Bukeng ea Luka, khaolo ea 17 le temana ea 29.

¹²⁶ Joale ho Luka 17:30, O itse, “Me joaloka matsatsing a Lota, mohla Lengelo la Morena . . .”

¹²⁷ Joale, O balile eona Bibele e tšoanang le ea rōna. ’Me mohla A . . . Menahanang le mohlala le fumane mofuta oa letsatsi leo pele ho pula ea Nohe. Khutlang le fumane mofuta oa letsatsi leo pele lefatše le timetsoa matsatsing a Lota. Le fumane na ho no le joang, ’me le bona seo Jesu a buileng ka sona.

¹²⁸ “Matsatsing a Nohe, ba ne ba ja, ba noa, ba nyala, ’me ba nyalisa; ha ba ka ba tseba ho fihlela ka letsatsi leo Nohe a keneng arekeng, ’me moroallo o fihla, ho ba hohola bohle.”

¹²⁹ Matsatsing a Lota, pele lefatše le . . . mollo o chesa lefatše la Balichaba, Basodoma, ho no ho le dihomosekuale, likhopamiso, ntho e ’ngoe le ’ngoe lefatšeng. Ntho e khōlō . . . E ne e le Los Angeles ea mehla ea joale; e se Los Angeles ea mehla ea joale feela, empa United States; e se United States feela, empa lefatše. Ehlide e le khopamiso! Monna a lahleheloa ke mohloli oa bona oa tlhaho le kutloisiso ea bona ea tlhaho ka tloaelo, a khopamisoa ke moea o mobe o fetotseng mophula ohle oa bophelo ba bona ka tlhaho, eaba ba haptjoa ke meeaa ea batemona. Haeba e se papiso ea matsatsing a Nohe, ha ke e tsebe, le matsatsing a Lota, ke

bolela ona. Le matsatsing a Nohe, hape, ho ja, ho noa, ho nyala, le ho nyalisa, makhotala a lihlalano a phophoma, le ntho e 'ngoe le e 'ngoe, joaloka mohlang oo.

¹³⁰ Empa, le hopole, le pele lefatše le senngoa, Abrahama o ronngoe holim'a lefatše 'me u fuoa tsepiso ea mora. 'Me Abrahama o kōpane le Molimo ka mekhahlelo e mengata, e le papiso ea kereke e kōpaneng le Molimo. Empa pejana ho tšenyeho le mora oa tsepiso a khutla, kapa a tlie, ke rialo, mora ea na tsepisitsoe, a fihla, Molimo o theohile oa bonahatsoa ka nama ea motho, ka ho monna, banna ba bararo. Eaba ba theohela ho Lota; oa etela Abrahama pele, ba lula fatše. 'Me Abrahama o fetotsoe lebitso ho tsoa ho Abrame ho ea ho Abrahama; Sarai ho Sara.

¹³¹ 'Me Monna enoa, e leng Sebui, Elohim, mohla A theohileng ho qoqa le eëna, O 'moleletse life? O itse, "O kae mosali oa hao, Sara?"

Ha thoe, "O ka tenteng, ka mora Hao."

¹³² Ho re, "Ke tla u etela ka nako ea bophelo." Eaba o itšeheila ka tenteng, ka mora Hae. 'Me O itse, "Sara o tšeheile keng?" Ua bona? Joale A ka be a tlositse bophelo ba Sara hantle mono, ka ho iqabola ka Lentsoe la Oona; empa A ke ke, ka ha Sara e ne e le karolo ea Abrahama.

¹³³ 'Me kajeno, Jesu o buile ho Luka khaolo ea 17 le temana ea 30, "Joaloka matsatsing a Lota, ho tla ba joalo nakong ea qetelo mohla Mora motho . . ."

¹³⁴ Joale le hopole, "Mora motho" ke *moporofeta*. Jehova o bitsitse Ezekiele "mora motho." Jesu o tlie ka mabitso a mararō: Mora motho, Mora Davida, Mora Molimo. O Ipitsitse "Mora motho" e le hore batho ba utloisise, hobane E ne e Moporofeta eo Morena Molimo o nong o tla mo hlahaha.

¹³⁵ Joale lemohang, eaba O tsepisa eng? Mora motho o tla Itšenola hape pejana ho nako eo, pele ho mollo. 'Me eo e le pontšo ea ho qetela eo Abrahama a e boneng pele mora a fihla; a fetoha mohlankana, le eëna ea eba mosetsana. Pele . . . Joale lemoha, Lengolo le e bolela e qoholehile, joale re tlameha ho shebella hoo.

¹³⁶ 'Me haeba re bona lefatše le kene khoparmisong le lintho tse ho lona kajeno, ho tsoella ka mokhoa oa lona, re ka e bolela e lôkile 'me re sa bolele e 'ngoe ena e lôkile? Hobane, motho e mong, u ntse u itsepisa kutloisiso ea bona, e se kutloisiso ea Khosana ea Bophelo E leng Motha ea na eme le bona khorong mane Sodoma. Joale, rea elella, ha re itšepe hlalefo ea rôna ka sebele.

¹³⁷ Nohe ha a ka a itšepa kutloisiso ea hae. E ne e le mongoaha o moholo oa mahlale, empa ha a ka a itšepa hlalefo ea hae ea letsatsi la hae. Empa a itsepisa tsepiso ea Molimo, 'me a tsamaisoa ke matla a Molimo, a lôkisa areka e pholosang balelapa la hae. Athe, e ne e le khahlano le kelello e pholileng

ka botlalo; metsi a le sieo holimō mane, a eso be teng. Empa o tsebile, ha Molimo o a boletse a tla ba teng, a tla ba teng. Ha a ka a itšepa hlalefo ea hae, empa ka tumelo a tsamaea ka tšepiso ea Lentsoe la Molimo. A tsamaisoa ke Moea, 'me o e khonne.

¹³⁸ Abrahama, ha a ka a itšepa kutloisiso ea hae mabapi le bophelo ba motho. A nyetse mosali oa hae a le lilemo tse batlileng ho ba leshome le metso e supileng. E ne e le enoa, a le lilemo tse mashome a supileng a metso e mehlano, 'me eèna a le mashome a tšeletseng a metso e mehlano, a le monyenyane ka lilemo tse leshome. Empa Abrahama a se ke a itšepa hlalefo ea hae, mohla Molimo O boletseng o tla mo nea mora ka Sara. Empa o bitsitse ntho efe, bopaki bofe ba mahlale bo khahlano le Lentsoe la Molimo, thuto efe kantle ho Lentsoe la Molimo, e ka hoja e se joalo. 'Me a bôka Molimo, a ipha matla, a ntse a Mo rorisa. A se ke a sheba 'mele oa hae kapa ho shoa ha 'mele oa Sara, kapa—kapa 'mele oa hae. A se ke a sheba letho, empa a itšepisa pallo ea Molimo. A se ke a itšepa hlalefo ea hae. A se ke a itšepisa ka mabaka.

¹³⁹ "Khele," u re, "Moena Branham, ho a utloahala ha Molimo o ke ke oa folisa bakuli, re na le lingaka tse ngata tse khabane."

¹⁴⁰ Bibele e boletse, "Re lihela mabaka kathoko." Ha re behe lebaka. Tumelo ha e behe lebaka. Tumelo e a lumela 'me e a amohela. Lemohang.

¹⁴¹ Empa o lumetse sebakeng sa ho se lumele; le ho bitsa lintho, tse neng li le sieo, e ka hoja li le teng, taba e beng e le khahlano le lebaka lefe. Empa a se ke a beha mabaka. O e lumetse feela. Mabaka a le sieo ho paka lesea le ka tsoaloa. Mosali eo a tlotse linako tsa mosali ea ilang ka lilemo tse batlileng ho ba mashome a mabeli a metso e mehlano, le 'mele oa hae o batla o shoele. 'Me mohla lilemo tsa hae li leng lekholo, lilemo tse mashome a mabeli a metso e mehlano ha morao, a sa ntse a rorisa Molimo, khahlano le kutlosiso ea mofuta ofe. Empa ka tumelo, o tsebile Molimo o tla boloka Lentsoe la Oona. A se ke a itšepa hlalefo ea hae.

¹⁴² Holane Moshe a itšepa hlalefo ea hae, mohla Molimo o 'molellang a tla—tla hapa Faro... kapa ho holla bana ba Iseraele letsohong la Faro? Holane a itšepa hlalefo ea hae, mohla a emeng pel'a Tšiea ea Mollo, mohla Molimo o itseng, "Theoha Ke tla ba le uena"? Holane a itšepa hlalefo ea hae mohla a ba fihlisang Leoatleng le Lefubelu, ke bao ba eme metsing, 'me mona Molimo o ba tšepisitse lefatše la pallo? Holane a itšepa hlalefo ea hae, "Ebe ke tla tšela joang mono? Ha re na nako ea ho haha borogo. Sesole ke sena se haufi. Mabota a lithaba ke ana mahlakore a mabeli. Metsi ke ana pel'a rôna, Leoatle le Lefubelu"?

¹⁴³ Joale, holane a itšepa hlalefo ea hae, a ka be a lahletse matsoho a hae sebakeng a baleha, ho itihela maotong a Faro, ho re, "Faro, ntšoarele, ke sitiloe."

¹⁴⁴ Empa a se ke a itšepa hlalefo ea hae. Empa a rapela, eaba Molimo o mo laela ho tsoelapele, leoatle la phetleha, taba e khahlano le mabaka ohle. Empa a se ke a itšepa hlalefo ea hae.

¹⁴⁵ Holane Joshua, mohla a ileng ho hloela teng le malumeli a mang a leshome, eaba o tloha a bona lefatše la Molimo la pallo, a ka be a khutlide le bona a re, “Joale beang butle motsotso. Ke ’nete. Re joaloka mehloenyane. Bona ke liqhobane. Re ka hla ra ba hapa joang? Ha re na le lisabole; haese seo re se thonakileng feela. Re ka kena joang ra hapa lefatše leo? Khele, ha se ntho e ka etsoang. Ba re imela ka palo, ka monna a le mong ho ba mashome a mahlano. Ke masole a koetlisitsoeng, ’me rōna re balisa ba linku le balubi ba seretse ho tsoa Egepeta. Joang? Ha rea tšoara le lithebe le lintho, re ka hla ra le hapa joang?”

¹⁴⁶ Khele, ehlide kutloisiso e ba pakile ba ka sitoa ho e phethissa. Monna ofe oa sesole joaloka eëna, kapa Moshe, a ka be a sa itšepa hlalefo ea hae. Empa hlalefo ea bona, ha ba ka ba itšepa eona. Empa ba tsebile Molimo o boletse, “Ke le neile lefatše leo. E-eang le le hape!”

¹⁴⁷ U se ke ua itšepa hlalefo ea hao. Haeba u itšepa hlalefo ea hao kajeno ha u kula, mohlomong u lutse setuleng sa bakuli, u bolaoa ke mofetše, lefu la pelō, le ngaka e u tlaleha u tla shoa, haeba u itšepa hlalefo eo, u tla shoa. Empa u se ke ua itšepisa hlalefo eo. Ruri le khale.

¹⁴⁸ Ho ka thoeng marakong a Jeriko, ho thoe a na ka beisa koloi ea ntoa holimō, marako a maholo ao? Molimo o itse, “Nyoloha u a potolohe makhetlo a makana, u bufšoile terompeta ’me bohole le hlabe littlatse, ’me marako a tla heleha.” Be, joale hoo ruri e ka ba bosoana kelellong ea tlhaho. Empa Joshua, ka ho tseba botenya ba marako ao, hoba o hahile marako a mangata tlase Egepeta. O tsebile samente e ka ho oona, bothata ba ona, ho kakatlela makoloi ao a beisang holima ona, esita le matlo a hahiloe holim’ a ona. Empa a se ke a itšepa hlalefo ea hae. A lumela polelo ea Molimo e le ’nete, a mamela Lentsoe la Oona, eaba marako a heleha. A se ke a itšepa hlalefo ea hae.

¹⁴⁹ Ho ka thoeng haeba a loanne ntoa eo, ’me, joaloka ha ke rerile Sontaha, ’me letsatsi le likela, sera se ne se thibeletsoe. Bosiu boo ba tla inatlafatsa ba khutle e le sera se matla a fetisang, ho bolaea banna ba hae ba bangata. Joale ha a na ka re, “Ke hloka leseli le itseng. Ke tlameha ho fumana leseli la letsatsi. Be, joale bea butle motsotso. Ke Molimo o laotseng sena, ’me letsatsi le a potoloha e le hore lefatše le potolohe. Joale ha re boneng, hola nka laetsa letsatsi ho ema . . . Lefatše ha le ka ema joale, le ka lahleheloa ke khoheli ea lona, nka tšoha ke oetse”?

¹⁵⁰ Ha a mamela hlalefo ea hae. Feela o itse, e bile, “Letsatsi, ema tsi; ’me, khoelei, ema moo u leng teng,” eaba le a mo utloa. A se ke a itšepa hlalefo ea hae. Empa a itšepela tšepiso ea Molimo, “Ke le neile lefatše leo; e-eang le le hape.”

¹⁵¹ U le file pallo ea Moea o Halalelang. Le ka O fumana sebokeng sena. Le ka O fumana hona joale.

¹⁵² U se ke ua itšepisa, “Ua tseba, ke khathetse. Ke tla u bolella, ke jele sophoro e ngata. Ha ke—ke—ke batle ha John a ka mpona ke etsa sena.” Oh, jo ’na! U ntse u itšepa hlalefo ea hao.

¹⁵³ “Pallo e etselitsoe lōna, le bana ba bana ba lōna, le ho ba leng hole kaofela, bao Morena Molimo oa lōna a tlang ho ba bitsa.”

¹⁵⁴ “Ngaka e ntlalehile ke ea shoa. E ntlahhlobile, ’me ea ntlaleha ke tšoeroe ke mofetše ona, ke tšoeroe ke sena, kapa seo e ka bang sona. Ke tlameha ho shoa.” U se ke ua itšepa hlalefo eo. Molimo ke Morena Molimo oa Hao Ea folisang maloetse a hao kaofela. Ka hona se tšepe kutloisiso eo, kutloisiso ea motho. Itšepise hlalefo ea Molimo.

¹⁵⁵ Ho ka thoeng ka Samsone, kantle koana tšimong, mohla Baflista, a khoroheloa ke sekete sa banna? ’Me eaba o eme mono, seeshana sa mothoana, ea moriri o mangetse, a le bophahamo bo bokaalo. A sa khona; be, e ne e se monna ea tšoarang sabole, hoba a ne a sa tsebe; a sa koetlisoa, koetliso ea sesole. E le memme oa mothoana ea hlooho e mangetse feela, joalo, likhole tse supileng li leketlile, nchanyana ea ’mè, a eme kantle mono, eaba mona ho hlaha Baflista ba sekete. Be, a sa tšoara letho letsohong la hae. A sheba fatše, a sela mohlaare oa khale, o tlabohileng, o mosoue oa moulu, ’me a o thonaka.

¹⁵⁶ Joale ha thoe, “Ha re bone, joale, nke ke ka etsa le le kaalo ka *sena*, hobane liheleme tseo tse hloohong ea bona ke... Baflista bao, masole ao ohle, bohle ba tšoere marumo. Bohle ba apere maqephe a qaphanang. ’Me boima ba liheleme tsa bona e le ’ngoe e batla e le lipondo tse leshome le metso e mehlano, liqbokane tsa bona ba litonana, bohle ba tsoile. Be, ha nka ratha ka thajana ena ea mohlaare oa khale o romotsehang oa moulu, holim’ a e ’ngoe ea liheleme tseo, khele, o tla kamoha liphatsa. Ke eona”?

¹⁵⁷ Ha a ka a itšepa hlalefo ea hae. A mpa a tšoara se letsohong la hae, a qala a otłaka Baflista. Hoba a khethule sekete sa bona, a sala a kokositse mohlaare letsohong la hae. Amen.

¹⁵⁸ Ha ke tsotelle seo thutamolimo ea motho e se buang, u se ke ua itšepisa eona. Itšepise Lentsoe la Molimo, “Jesu Kreste maobane, kajeno, le ka mehla.” Ruri, o e lumetse.

¹⁵⁹ Ho ka thoeng holane Davida a mamela Sams-... thutamolimo ea Saule? Goliathe a eme mono a ithorisa a iphafa, mang le mang a tšaba; Saule, a eme maoto le mahetla holim’ a sesole sohle. Goliathe a re, “Motho a qatsohe a ntoantše. Ha re hloke ho—ho shoa bohle. Ha nka u bolaea, le tla re sebeletsa bohle. ’Me ha u ka mpolaea, khele, re tla le sebeletsa,” ka hobane a ne a mo okametse. Diabolosi o rata ho etsa joalo, mohla a ntšitseng seminari ea hae eohle, le bao kaofela ha bona, mohla a hlahellang, ua bona.

¹⁶⁰ Davida mothoana oa khale ea ntseng a likoloha mane, a itlamile ka letlaloana la nku; ea mokhubetsoana, ea lekokoto, seeshana se batlile ho ba lekholo la lipondo, lekholo le lesome. O itse, “Le re makhotla a Molimo o phelang, a bololitsoeng ka selekane, a ka ema a tlohela Mofilista eo oa leqai a nyefola makhotla a Molimo o phelang?”

¹⁶¹ Saule o itse, “Tloo koano, moshanyana.” A re, “Ke tsota sebete sa hao, empa matsatsi a mehlolo a fetile. Ha re sa fumana ntho e kang eo, ua bona. ’Me e re ke u bolelle taba, u ka hlahisa setlankana sefe sa bolekane, ua bona? Ha u a tšoara le sehlomo. Ha u a tšoara letho ha e se letjeketjane letsohong la hao. Ua bona? Ha u a apesoa Ph.D. kapa LL.D. U tla e phethisa joang? Khele, monna eo ke seloani. Khele, ke e—e o apesitsoe D.D., bo L ba babeli, Ph.D., LL.Q. Hobaneng, o tšoere ligarata tse ngata hakana, a ka lila lebota ka tsona. ’Me uena u mang? Molisana oa linku.”

¹⁶² A re, “Empa ke batla ho u bolella taba.” A re, “Ua tseba keng?” Ho re, “E ne re ke alositse linku tsa ntate kantle mane, ’me,” ho re, “eaba tau e kena e phamola e ’ngoe, ea matha e tsoa. ’Me ua tseba, ka tšoara letjeketjane ka e sala morao, ka e lahla fatše. Ka e amoha e—e konyana molomong oa eona, ea ntsohela matla ha ke etsa joalo. Ka tšoara thipa feela ka e bolaea.” Ho re, “Ka khutlela morao. ’Me mona ha khoroha bere e kenang, ea sala nku morao, ea e tšoara ea tsoa e matha. Le eona, ka e bolaea.” A re, “Joale oona Molimo . . . E seng Ph.D., e seng hlalefo ea ka. Nke ka u bolella ka moo ke khonneng. Ha ke tsebe ka moo e sebetsoang kateng. Empa oona Molimo,” amen, “oona Molimo o ntoetseng linaleng tsa bere le tsa tau, ha kakang A ka ’namolela letsohong la Mofilista eo ea sa bollang!”

¹⁶³ Mobishopo, Saule, o itse, “Ua tseba, kea lumela u na le pitso, moshanyana. Ke tla u bolella, ha u ka tla koano, ke tla u koetlisetsa maqiti a ho betana le motho, ua bona. ’Me ke tla u bolella, ’na ke—ke ngaka, joale khoesa sehlomo sa hao. Ke batla ho u apesa.” Davida a ema mono, ’me ba mo apesa Ph.D., le LL.D., le seo sohle, ’me—’me mothoana oa batho a sa khone le ho tsamaea. A sa tsebe mokhao.

¹⁶⁴ A re, “Ha ke eso e leke le ka mohla. Sehlako sena sa tšebeletso ea bolisa ha se ntekane. Ntlhoboliseng eona. Nteseng ho ea ka seo Molimo o nthusitseng ka sona.” E ne e le tumelo matleng a Molimo. ’Me ha a—a ka a itšepa hlalefo ea hae. Ha a ka a itšepisa ka seo mang a se buileng. A itšepisa tumelo. Hobane, a tseba haeba Molimo o mo namolela linaleng tsa bere, hakakang O ka mo namolela ho Mofilista eo!

¹⁶⁵ Be, efèla ha Molimo a o ratile hoo a u hollotseng sebeng le ho u tlatsa ka Moea o Halalelang, molato ke ofe ka lōna bafokoli ba bafutsana ba mekokotlo e rekereke naha ka bophara, na hakakang A ke ke a le loela pabong ea lōna athe O tsepisitse A tla

e phethisa? Lentsoe la Molimo le boletse joalo. O tla e phethisa. Ehlide, O ile a mo loanela letsohong leo.

¹⁶⁶ Oh, e mong le e mong oa baporofeta, ho ka thoeng hola ba itšepa hlalefo ea bona mongoaheng oa bona? Ba ka be ba sa khahlana le baprista bao le baprista ba baholo, ba ba bitsa “mabota a masoēu” le ntho eohle ese. Ba ka be ba sa porofeta khahlano le bona. Ba ne ba tla itšoanelo le baporofeta ba mehla ena, ba ee ba lumellane, ba apare liaparo tse ntle, ’me ba itulele matlung a likhosi.

¹⁶⁷ Hola Johanne a leka ho itšepa hlalefo ea hae? Empa o nyolohile hantle.

¹⁶⁸ Ba itse, “Joale, bea butle motsotso, Johanne, u se ke ua rera *Lenyalo Le Hlalo*.”

¹⁶⁹ A nyolohela paleising ea Heroda hantle, ’me a re, “Ha se tšoanelo ho uena ho inkela eëna.” E, monghali.

Ho re, “Be, ua mo tseba ke mang eo? Eo ke proc- . . .”

“Ha ke tsotelle na ke mang.” Ha a ka a itšepisa.

¹⁷⁰ Ha thoe, “Joale ha u na ho lekaneng. U ahile tlase mona nahathote ena. Setlamo ha se u amohele, ha u itšoara joalo.” Ha a ka a tsotella setlamo sefe. A se ke a itšepa hlalefo ea hae, empa kutloisiso ea Molimo. Ehlide.

¹⁷¹ Monna o ne a le teng a kile a itšepa hlalefo ea hae, ’me lebitso la hae e le Judase Iskariota. Oh, eëna . . . ha ke—ke bone ka moo a khonneng ho e phethisa. O tsamaile le Kreste lifahleho li talimane, joaloka Eva tšimolohong. O ne a bone nètfatso, a talimana le Molimo sefahlehong, joaloka Eva mantsiboea ha ho pholile. Eva o ile a talima Kreste, mantsiboea ha ho pholile, tšimong. Le Judase o kile a lula mantsiboea ha ho pholile, serapeng sa Gethsemane le linqalong tse ngata, a kile a talima Kreste eëna eo; o Mo utloile a ruta, ho Ikholisa ka Lentsoe, ho nètfatsoa e le Moporofeta eo Moshe a mo boletseng a tla hlahisoa. Le ho ba bolella Lengolong hore E ne e le Mang, le tsohle mabapi le eona. Ba e bone e kholisoa ke Molimo, hore E ne e le eëna, eaba o itšepa hlalefo ea hae.

¹⁷² Uh! Na u khonne joang ho e etsa? Hobane a ne a le lehahla tlase mona, tabeng ea pele. E ne e se peō e phelisitsoeng. E ne e le mora oa tahleho, a tsoaletsoe tahlehong, a khutlela tahlehong. Joale rea lemoha. Empa o tsoile, ’me eaba o fuama mohopolo oa hlalefo ea hae. A hopola hobane Jesu . . . O ne a Mo hlompha haholo, “Joale, ua tseba, nka Mo rekisa ka likotoana tse mashome a mararō tsa silifera. ’Me ha ke etsa, ke tla itholla cheletana, ’me nka iketsetsa ntho ka eona. ’Me eëna O khona ho Inamolela.” Ua bona, ha a tseba, ka Lengolong, a hlahiselitsoe ho nka malulo ao.

¹⁷³ ’Me le kajeno batho ha ba lemohe maemo ao ba hohlometseng ho ona. Kereke ea Laodisea e laotsoe ho kena maemong ana, ho

ntša Kreste. 'Me O a kokota, o leka ho khutlela ka hare. [Moena Branham o kokota sefaleng—Mohl.] Ha ho tšebelisano-'moho hohle, le hona. Ho nètefatsa Lentsoe la Hae letsatsing lena joale, ho tšoana le ha A entse letsatsi le leng le le leng, 'me ba e suthela ba tloha. Ba itšepa hlalefo ea bona, ke hona—hona hoo feelsa.

¹⁷⁴ Kapa, koana, ha re—ha re re eaba o a inahana. Koana haeba a rekisitse Kreste ka likotoana tsa silifera tse mashome a mararō, khele, a ka tsoa a sotelitsoe e—e bolekaneng ba mekhatlo e itseng e meholo ea malumeli a letsatsi leo, Bafarisi le Basadus. A re, "Joale bea butle, A ka Itebel. Ke 'Mone lintoeng tse thata; ke—ke tseba hoba—hoba A ka Itebel. Ka hona nka iphehlela cheletana, e ka batla e le e—ea ho beha meja fatše, ka mokhoa oa teng. 'Me ebile, hape, nka taká seriti se seholo likerekeng tse khôlô tsena kajeno, ha nka Mo ekela bona." Ua bona? Empa a itšepa hlalefo ea hae, sebakeng sa hlalefo e reng leo e ne e le Lentsoe la Molimo le nètefalistsoeng, a etsa ho Jesu seo Mangolo a 'moleletseng a tla se etsa.

¹⁷⁵ 'Me, kajeno, kereke e ka lefatšeng e ntšelitse Kreste kantle matsatsing ana a ho qetela, ho latèla ka moo Buka ea Tšenolo e ba boletse hantle. Ke moea oa Judase hape, ka sebopeho sa kereke, "Ba nang le sebopeho sa borapeli, ba mpa ba latola Lentsoe." Ua bona? Ke hantle. Joale, oh, banna, liphetho ebile life? Lefu, joaloka ha e sebelitse ho Eva. Le ho bohle ba lekang ho khopamisa Lentsoe la Molimo 'me ba itšepa hlalefo ea bona. Esita le joale ba rekisa, e seng ka likotoana tse mashome a mararō tsa silifera, empa e ka ba, oh, ofisiri e khôlô, boitsebelo bo itseng ba seminar. Ha e je le likotoana tse mashome a mararō tsa silifera, feela ba e rekisa le ha ho le joalo; ho rekisa kutloisiso ea bona ea Molimo, ka ntle koana, malulong a ntho e kang eo.

¹⁷⁶ Phapang e kakang papisong le Santa Pauluse e moholo oa morutehi, a hlometsoe tsebo eohle ho iphafa ka eona. Empa o boletse, "Ke lahletse hohle, mabaka a ka ohle, fatše. Ke kôpane le Tšiea ea Mollo tsatsi le leng, tseleng e theohelang Damaseka." 'Me o itse, "Ha kea tla ho lôna ka puo e khahlang, hoba, hola ka etsa, le ka itšepisa ka bohlale ba motho. Empa ke tlie ho lôna ka matla le liponahatso tsa Moea o Halalelang, hore le—le itšepise hlalefo ea Lentsoe la Molimo." Amen. Ho re, "E ka re ha ho fihla Lengeloi le tsoang Leholidmông, le porofeta ntho e hosele, le rohakoe," Bagalata 1:8. Ke hantle. Che, monghali. Ha e etsa le ka mohla.

¹⁷⁷ Mosajana selibeng, o ne a nyehlile maitšoaro. Empa o tsebile hoba likereke li mo khaotse. 'Me, feela a se ke a itšepa hlalefo ea hae. Mohla a kôpaneng le Enoa selibeng, Ea 'moleletseng libe tsohle tsa hae tsee a li entseng, a matha a kena motseng. Joale e ne e se tšoanelo ho mosali ho etsa joalo, ho kena le ho etsa eng le eng, ka ha e ne e le seotsoa. Empa hoba a kôpane le Jesu, a se ke a itšepa hlalefo ea batho, matsatsing ao. O tlie, ho re, "Tloong,

le bone Monna Ea mpoleletseng tseo ke li entseng. Na ha se eèna Messia?" A se ke a itšepa hlalefo ea hae. Che.

¹⁷⁸ Movirigo Maria, mohla Lengeloi Gabariele a kópanang le eèna a 'molella a tla fumana lesea, a se na monna. Shuu! Ha eso hlahe. A se ke a itšepa hlalefo ea hae le ka mohla, hore mosali a ka fumana lesea a se na e-e monna. A se ke a itsepela ho eona. Empa o itse, "Bonang lekhabunyane la Morena, ho be ho 'na ka Lentsoe la Hao." A se ke a re, "Ke tla e khona joang? 'Me ebe ke e etsa neng? 'Me ebe sena sohle se tla etsahala joang?"

¹⁷⁹ Lengeloi le itse, "Moea o Halalelang o tla u khurumetsa; 'me Ntho e Halalelang e tlang ho tsoaloa ke uena e tla bistsoa Mora oa Molimo."

¹⁸⁰ A re, "Bonang lekhabunyane la Morena." A se ke a itšepa lebaka la hae, ho bolela e ke ke ea etsoa. O sa tsoa bolela, "Bonang lekhabunyane la Morena." Ke hantle. Lemohang.

¹⁸¹ E-e mosali oa phallo ea mali, ngaka e 'moleletse, ha thoe, "Litšepo li felile." A sebelisitse thepa tsohle tsa bophelo, lingakeng, 'me a sa thusoa ke efe. 'Me a se ke a itsepisa hoo. Mohla Jesu... A pholletsa letšoèle, a re, "Kea lumela ha nka ama liaparo tsa Monna eo, ke tla fola." O fetela koo.

¹⁸² "Joale bea butle, ngaka e boletse, 'U ke ke ua fola.'" Phallo ena ea mali e mo tšoere lilemo le lilemo. A eketsa ho fokola ka linako tsohle, le ho mpefala. Lingaka li se li mo tetse. E le phetho kutloisiso ea bona.

¹⁸³ Empa o itse, ka tumelo! Ha ho Lengolo le 'molellang ho etsa joalo. Empa o itse, "Ha nka ama qola ea seaparo sa Hae, ke tla fola," 'me a nanya a Mo ama. A khutla, a lula fatše.

¹⁸⁴ Jesu a retoloha a re, "Ke mang ea Nkamileng?" Ho qamaka ho fihlela A mo fumane. A 'molella ka phallo ea mali a hae.

¹⁸⁵ 'Me a utloa nakoaneng eo, 'meleng oa hae. O ne a sa khone ho e paka lekhatheng leo, empa a utloa phallo ea mali e khaolitse 'meleng oa hae. A se ke a hlola a beha lebaka, "Haeba ngaka e mo tetse, a ka hlola a thusoa keng?" Ha a ka a laetsa lebaka, empa a tsethemela tumelo.

¹⁸⁶ Joale Bibebe e boletse, "Ke Moprista e Moholo, kajeno, ea ka angoang ke maikutlo a mahlomola a rôna." Na ho joalo? [Phutheho e re, "Amen." Mohl.]

U se ke ua laetsa lebaka, ho re, "Oh, hoo ke..."

O itse, "Kajeno Ke seo. Eèna hona joale Ke Moprista e Moholo ea ka angoang ke maikutlo a mahlomola a rôna. Eèna maobane, kajeno, le ka mehla!"

¹⁸⁷ Le hopolang mohla ke leng moreri oa Baptise kantle mane, 'me Lengeloi leo la Morena le kópane le 'na kantle mane la ntaela ho ea etsa seo ke se etsang? Khele, molisa oa ka o itse, "U se u hlanya. Khele, u ne u tšoaroe ke sesitahlohoana, uena."

Ka re, "U mpe u nke setlankana sa ka sa bolekane hona joale."

¹⁸⁸ Joale, o itse, "U tla khona joang, u sa hlomelloa le ka thuto ea sekolo sa gramma, ho rera lefatše ho pota? U tla khona joang ho rapella likhosí le batlotlehi, 'me u—u—u batla u sa khone le ho sebelisa gramma ea hao ka tšoanelo?"

¹⁸⁹ Ke ne ke sa itšepisa gramma ea ka. Ke ne ke sa itšepisa bokhoni ba ka. Ke ne ke romiloe. Alleluia! Ha kea seohele mabaka. Holane ka mamela mabaka, kea kholoa ho ka be ho shoele likete tsa batho, lilemong tse fetileng. Empa ka jara Molaetsa ka tšoanelo A e boletseng, ho pota le ho pota lefatše.

¹⁹⁰ 'Me joale ke boela ke falla, ka mohau oa Molimo; e seng ka mabaka, empa ka thomo. Alleluia. Ha kea ka ka itšetleha . . . U re, "Lilemo tsa hao li mashome a mahlano a metso e mehlano." Le holane ke mashome a robong a metso e mehlano, hoo ha ho bolele letho. E sa le oona Molimo oo E neng e le oona le Abrahama. E, monghali. U se ke ua itšepa ua lihlalefo tsa hao.

¹⁹¹ 'Me hoba pontšo e hlahelle, 'me Puo e latète, 'me likereke li qala li nteleka li koala menyako, ka baka la Thuto, athe mang oa bona a ke ke a iteta sefuba ho ema pel'a ka ho E bolela e lókile kapa e le phoso. Ke phepetsa mang oa bona. Uh-huh. Ha se ho ipeha bohlale, empa ke tseba moo ke leng teng. Ke hantle. Eaba ba etsang? Eaba ba etsang? Ba koala monyako o mong le o mong. "Joale e be u tla etsang?"

¹⁹² Letsatsi le leng, holimō thabeng, eaba ke eme mono. Ka re, "Morena, ke buletsoe monyako o le mong feela sechabeng sohle, ho latèla tsebo ea ka, oona ke Phoenix, Arizona. Ona feela oo ke o fumaneng." 'Me ka theoha thaba. Ka ho hlaka hoo nkileng ka utloa motho mang a bua, ha thoe, "E ka ba eng ho uena? U sale 'Na morao." Ka hona, ha se holim'a hlalefo ea ka. Ke itšepisa ka pallo ea Hae.

¹⁹³ Oh, motsoalle, u se ke ua itšepisa mabaka. U ntano hlabatlatse, 'moho le Eddie Perronet oa boholo:

Ahe ho bokoe matla Lebitso la Jesu!
Mangeloi a namalle a iname;
A tlise mokhabo oa borena,
A Mo tlottle Morena oa tsohle;
Ho Mo tlottla Morena oa tsohle.

¹⁹⁴ Ke hantle. U se ke ua itšepa seo u se nahananang, seo motho e mong a se nahananang. Ka tumelo u amohele tšepiso ea Molimo. Na le tla etsa joalo? Joale ha se haeba motho e mong a e entse, haeba ba sa e etsa, empa u reng ka uena? U tla etsa'ng ka Jesu enoa ea bitsoang Kreste, ea Itsebisang letsatsing lee, joaloka ha A entse letsatsing leo? Na le a Mo lumela? [Phutheho e re, "Amen." —Mohl.]

Ha re rapeleeng.

¹⁹⁵ Morena Jesu, Khosi ea likhosi, 'Musi oa babusi, Molimo oa melimo, Molimo oa batlotlehi bohole; oa Pele, oa Morao; the Alfa, Omega; Qalo le Qetello; Naleli e Khanyang ea Meso, Rosa ea Sharone, Mohalalitoe oa Phula, Motso le Lehlomela la Davida; tloo, Morena Molimo, eèna maobane, kajeno, le ka mehla!

¹⁹⁶ Hlohonolofatsa sehlopha sena sa batho, Morena. Sena... [Sekheo lebanteng—Mohl.] ho itokisetsa feela ho qala hosane hoseng. Re ile ra tšoara kōpanonyana mona, 'me Ua re hlohonolofatsa ho eona. Ua Itsebisa rōna. Kea rapela, Molimo, hore U tsoelepele ho Itsebisa rōna. Re hlohonolofatse bosius bona. Re thusé joale. Re batho ba hlokang.

¹⁹⁷ 'Me, Morena, Ua ntseba ha ke rate ho omanya batho, empa ebe nka khutsisa mollo o halalelang oo joang? Ha ke rate ho etsa hoo, Morena. U tseba bophelo ba ka, pelō ea ka. Ke tšoanelia ho e etsa. 'Me kea rapela, Molimo, U tla nthusa ho etsa joalo. Nkhauhele feela, 'me le ka mohla u se ntumelle ho itšepa hlalefo ea ka, empa ho itšepisa pallo ea Hao. Ka Lebitso la Jesu. Amen.

¹⁹⁸ Ke batla lōna, e mong le e mong, le apare tšabo ea mannete metsofso e 'maloa feela. Sehlopheng sa batho bana, ho na le banna le basali ba lutseng mona, ntle le pelaelo, ba kulang. Ba kulang le ba hlokofetseng ba bakae ka mona, phahamisang matsoho a lōna, ho re feela, "Ke hloka Molimo"? Ako phahamise letsoho la hao feela hona joale, "Ke hloka Molimo."

¹⁹⁹ Joale, ha ke tsebe batho ba bangata haholo. Ke tseba bashanyana ba bararō bana ba lutseng hantle mona. Ke tseba Mongh. Dauch le mohatsae ea lutseng mane. Kea kholoa, kea kholoa enoa ke Khaitseli Moore. Ha kea tiea. Na ke 'nete, Khaitseli Moore? Kantle ho moo, kea kholoa ke phetho, bakeng sa Moena Mike le kalana. Ho latēla bohole, boo nka bo bonang, bao ke ba tsebang.

²⁰⁰ Empa Ntate oa Leholimō Ea tšepisitseng, 'me letsatsing lena O tla Inétefatsa mongoaheng ona, hantle feela joaloka ha A entse Sodoma. Na O e tšepisitse? [Phutheho e re, "Amen."—Mohl.] Ho Iponahatsa! Na le lumela seo? ["Amen."]

²⁰¹ Joale ha u ka rapela, le ka tumelo! Joale se leke ho beha lebaka, "Nka Mo ama joang joaloka Moprista e Moholo?"

²⁰² Joale, Bibele e boletse, Testamente e Ncha, "Ke Moprista e Moholo hona joale hantle. E sa le Moprista e Moholo ka mokhoa oa Melkisedeke. Ke Moprista e Moholo ka mehla. Ha ho Moprista e mong e Moholo kantle ho Eèna. Ha ho moemeli e mong lipakeng tsa Molimo le batho, kantle ho Monna eo Kreste." Ke hantle. Ke Eèna a Inotši, 'me esale Eèna maobane, kajeno, le ka mehla.

²⁰³ Joale haeba A ituletse e le Moprista e Moholo eo, 'me Bibele e boletse, "Re ka Mo ama ka maikutlo a mahlomola a rōna," joaloka mosajana eo ea ammeng seaparo sa Hae, tumelo ea hao e ka Mo ama bosius bona 'me O tla tšoara ka ho tšoana, nameng ea motho, joaloka ha A entse nameng ea motho mane—

mane eikeng ea Abrahama. Na le lumela seo? [Phutheho e re, "Amen."—Mohl.] O tsepisitse A tla e phethisa. Joale rapela feela, mang le mang ea nang le thoko. 'Me ke—ke . . .

²⁰⁴ Ke mokana ke boletse, neo ha e tšoane le ho kokosa thipa, 'me ha u batla ho hlaba *sena* ka eona, u ka se hlaba; kapa ua hlaba *sena*, u ka se hlaba, kapa seo u batlang ho se etsa. Eo ha se neo ea Molimo. Ua bona? Che.

²⁰⁵ Neo ea Molimo ke mokhoa o itseng oa ho itlosa tseleng. 'Me lineo le lipitso ha li ne li reroe pele ke Molimo. "Lineo le lipitso ha li tlisoe le ke pako." U tsoaloa le eona. Ke gere eo u ikenyang ho eona, empa ha u khone ho hata pedale eo. Ua bona? Ke Molimo o tlamehang ho e laola. U tlameha ho itšutisa tseleng.

²⁰⁶ Tumelo ea hao e ka e laola, e seng ea ka; ea hao. Ea ka ke ho e tlosa tseleng feela. U lumele ka pelō eohle ea hao hore Jesu Kreste o a phela kajeno.

²⁰⁷ U se ke ua itšepa hlalefo ea hao, u re, "Be, joale sheba, ke—ke boemong bo mahlonoko, moena. Ha u ntsebe. Esale ke lula setulong sena sa bakuli. Esale ke . . ."

²⁰⁸ Ha ke tsotelle na u kile ua ba eng, le ho bona haeba Molimo o ke ke oa theoha ua etsisa hantle seo O se entseng mehleng ea Oona mona holim'a lefatše ka 'mele oa nama. O tla e phethisa 'meleng oa hao, 'meleng oa ka, 'moho re le bonngoe ho lumela ho Eèna. O tla e phethisa hobane O tsepisitse O tla e phethisa.

²⁰⁹ Joale u se ke ua itšepisa hlalefo ea motho e mong ea reng, "Oh, boo—boo ke bokhoni ba ho bala mohopolo," ba Bo bitsa joalo. Ba tlalehile Jesu e le eona ntho eo. Ba Mo tlalehile e le senohe-ramahlohonolo, "eona devele." Empa E ne e le Mora oa Molimo, hoba A tlide ho latèla Lentsoe la Molimo la pallo.

²¹⁰ Joale, mokana ke boletse, libaka tsa rōna—tsa rōna, ha rea tlameha ho li fumana, ho nyoloha le ho beha batho matsoho. Re ba behile matsoho maobane. Empa u tlameha ho ba le tumelo inotši, le ho lemoha. Ka tumelo u a e amohela, ka tumelo. Ha se—ha se ka letho le sele le . . .

U se ke ua re, "Be, ebe joale e ka etsoa joang?"

²¹¹ Hola nka u bolella ka moo e entsoeng, ha e hlore e le tumelo. Ha ke tsebe e etsoa joang. Ha ke tsebe, empa kea e lumela. Ha ke—ke tsebe mokhoa—mokhoa oo Molimo o pholosang moetsalibe, empa O a e etsa. Ha ke tsebe na Molimo lintho tsena o li etsa joang, empa kea e amohela. Eèna, O a e etsa, 'me ke eona tsela. Hobane, ha ke khone ho e hlalosa. Joale, be, ke . . . E ke ke ea hlalosoa le ka mohla. Ha ho mang ea ka khonang. Hobane, ha u ka khona, ha e sa hlore e le tumelo.

²¹² Ha ke bone na Molimo le Kreste e ka ba Motho ea tšoanang joang, empa Ba ne ba le joalo. Lengolo le boletse. Be, ha u khone ho e hlalosa, empa, Ba ne ba le joalo. "Ntate oa Ka o ka ho 'Na. Ha se 'Na ea etsang mesebetsi; ke Ntate oa Ka ea ahileng ho 'Na.

Ekare ha Ke sa etse mesebetsi ea Hae, hoo ho 'Ntšupa ke se oa Hae. Empa ekare ha Ke etsa mesebetsi ea Hae, ke Eèna ea pakang ka Sebele hore Ke oa Hae."

²¹³ Be, ho a tšoana le hona joale, e tšoana hantle. Esale Eèna maobane, kajeno, le ka mehla, ha u ka lumela.

²¹⁴ Joale monna o lutse hantle mona ka pel'a ka, o moriri o leroootho. O khoesitse tšupanako sephakeng; ka sutu e leroootho. O roetse ligalase. Ha le ka sheba mona hantle, le 'mona a lutse a tutubetse, a ntse a rapela. Ha ke tsebe monna eo. Ntate oa Leholidō o tseba ke sa mo tsebe. Empa ke tla mo sheba motsotsso feelsa, hoba o shebeha a tšepahetse, a lutse mono. Esale ke buile, eaba monna o a tutubala o qala a rapela. Monna eo ke molata ho 'na, ke eona, mono ke matsoho a ka. Ha ke mo tsebe. Molimo o tseba monna eo, 'me A ka ntšenolela. Haeba tšepiso eo e nèpile Bibeleng, A ka ntšenolela lebaka la monna ho koala mahlo a hae, le seo a se rapellang. Na le lumela seo? [Phutheho e re, "Amen."—Mohl.]

²¹⁵ Na u a e lumela, monghali? Ha u ka bula mahlo a hao, u lutse hantle mona, shebang hantle mona. Na u lumela seo? Ho lòkile. Joale ua tseba ha ke u tsebe. Ha re tsebane. Empa Molimo o a u tseba. Joale o qalile o a lla, ho bokolla. Hobane, nka 'molella joale hore Molimo o tlil'o arabela kōpo ea hae, ua bona, hobane ntho e sa tsoa mo khahlola lekhatheng leo, Leseli leo; ho tloha lefifing, ho fetohela Leseling. Ua bona?

²¹⁶ Joale, monna, o ntse a rapella motho e mong, 'me ke moshanyana enoa ea lutseng mona pel'a hae. Ke mora oa hae. Ke hantle. Joale, moshanyana eo o na le—le pherekano mpeng, le phoso maleng a hae. Ke hantle. Ke hantle.

²¹⁷ Ha ba tsoe mona. Ha u tsoe Arizona. U tsoa California. Hantle. 'Me u moreri, 'me bolekane ba hao ke ba Assemblies of God. Ke 'neta. Rev. McKeig ke lebitso la hao, kapa, Rev. Keig, ke hantle. Na ke 'neta? Tsokotsa matsoho a hao ka tsela *ena*. Joale moshanyana oa hao o tla fola. Ua bona? Tumelo ea hao!

²¹⁸ Joale eng? Joale monna o teng o phahamisitse matsoho, ha a ntsebe, ha ke mo tsebe. Empa e ne e le eng? O amme Moprista e Moholo. Joale, ua bona, ha a khona ho itšepa hlalefo ea hae. Joale seo a tlamehang ho se etsa, o etsang hona joale? O tlameha ho lumela seo a se boleletsoeng, 'neta, hoba o a tseba ha a ntsebe. Ke hantle.

²¹⁹ Mona, mona ho lutse mosali hantle ka pel'a ka, le eèna, o inamisitse hlooho. O jeoa ke mofetše. Le eèna o tsoa California. Kea tšepa a ke ke a fosa sena. Mofn. Adams. Ke lebitso la hae. Ha ke eso 'mone bophelong ba ka. Yaa, ke 'neta.

²²⁰ Ho na le leleiti le lutseng hantle morao kantle *mona*. Ha ke khone feelsa ho beha, ho mo supa feelsa, empa ke bona Leseli le lopaletse holim'a hae. O mathateng a tebileng. Bothata ba hae ke molala, ntho e 'ngoe. 'Me ntho e 'ngoe, o—o na le e—e mathata

a moea, o tšoenngoa ke ho touta. 'Me o na le mathata a lelapa; morali oa hae o balehile feela. Ke hantle. Ke 'neta, ha se eona? O phahamisitse letsoho. Mof. Miller. Ke 'neta. Na u a lumela? Molimo o tla mo khutlisa, a folise 'mele oa hao. Joale, ha ke eso 'mone bophelong ba ka. Ke molata ka bottlalo.

²²¹ Mona ho lutse leleiti, letšoeleng. Ha a—a tsoe mona, le eèna o tsoa California. O tšeroe ke mofetše, 'me mofetše o letsoeleng. O kile a sehoa letsoele le leng, eaba e fallela ho le leng. Hantle. Mfn. Calvin. Ke hantle. U a lumela Molimo o tla o folisa? U a e lumela na. Ke molata ho uena, leleiti. Ha ke u tsebe. Ke 'neta. Ua bona? O mofetše.

Ke hore le tsebe Molimo o teng!

²²² Ho na le leleiti le lutseng pel'a hae. Lebitso la hae ke Mof. Harris. Ke molata ka bottlalo ho 'na. Empa eitse ha Moea o khahlola mosali enoa, o boetse o mo utloela bohloko. 'Me o tsoa California. Ke hantle. 'Me bothata ba hae ke lehetla. Ke hantle. U lumela Molimo a tla u folisa. Haeba e le 'neta, phahamisa letsoho la hao batho ba bone; molata ka bottlalo.

²²³ U se ke ua itšepa hlalefo ea hao. Ho ka etsang joalo ke hofe? U ke ke ua e hhalosa. Ke mohlolo. E sita tlhaloso. Botsang batho bao; ha ke eso ba bone bophelong ba ka, ha ke eso tsebe letho ka bona. E ka haola hara kópano feela.

²²⁴ Empa, joale shebang, u se ke ua itšepa hlalefo ea hao. Empa itsepise ka pallo ea Hae, hore O tla etsa hoo; haeba e se oona Moea o nong o ahile nameng ea motho, o tsebileng Sara a tšehele ka tenteng, ka morao ho Monna. Na ho joalo? 'Me O tsepisitse, pejana lefatše le timetsoa ka mollo, mohla Mora motho a tla Itšenola hape ka ho tšoana, joaloka e—e Mora motho (boporofeta) o tla Itšenola ka nama ea motho joaloka ha A na le rôna mona bosiung bona, joaloka ha A entse mohlang oo. Joale ebe re phela horeng efe? Haufi le tšenyeho feela.

²²⁵ Motsoalle, u se ke ua ema mona, halelele, moetsalibe. Amohela Jesu Kreste u sa le ka pel'a Sefahleho sa Hae. Joale, kea tseba, ka tloaelo ke temalo ho bareri ho qeka le ho phetha lipale, ka 'mè ea shoeleng ea iketseng. Hoo ho itoketse. Empa ha re tle holim'a motheo oa 'mè oa rôna ea shoeleng. 'Mè oa ka o shoele, le eèna; ntate oa ka, le eèna. Empa re nyoloha, ka phalimeho, ho amohela holim'a motheo oa Molimo o Iponahatsang ka ho Jesu Kreste, ho tlosa libe tsa lefatše. Rea tla 'me re lumela holim'a Pheko. 'Me e re A sa nètefalitse Lentsoe la Hae . . .

²²⁶ Ha ke tsotelle kereke u e keneng, Methodise, Baptise, Katolike, Presbeteriene, kapa ho se kereke ho hang. Ha u amohela hobane u e utloisisitse ka ho fapania, 'me u itseba ruri u eso tsoaloe labobeli, empa u batla joalo, 'me u batla ho e amohela joale, tšepiso joale. U ka tšoha u sa tlatsoe hona joale, empa u tla tlatsoa mohla e . . . ha likópano li tsoelapele. U batla ho e amohela holim'a metheo eo, na u ka ema ka maoto a hao 'me ua

ntumella ho u etsetsa thapelo hantle moo u emeng. E mong e e mong ka mona ea tsebang . . .

²²⁷ U se ke ua itšepa bo-ueno, be, ho re, “Ke buile lipuo.” Joale, hoo ha ho amane le eona ka letho. Ke lumela ho bua lipuo, le ’na.

²²⁸ Empa ke bone baloi, bodevele, le ntho eohle, e bua lipuo ’me e koaholla. Ke hantle. Botsa baromua tlase mona, re ka fumana, Moena Creech, ’me ua tseba ke ’nete. Ke ba bone ba bua lipuo, ’me ba phoka mali lehateng la motho, ho bitsa devele. Ehlide. Ke ba bone ba robatsa potloloto, ebe e peralla e ngola ka lipuo tse sa tsebjoeng; ’me moloi kapa mouPELLI a eme mono, a e koaholle.

²²⁹ Ka hona ho bua lipuo ha se pontšo ea letho ea hobane u na le Moea o Halalelang. Efèla hoo, ’me ha u bua lipuo ’me u hanela Lentsoe lena, phoso e teng nqa e ’ngoe. Hantle, uh-huh, hantle. U se ke ua itšepa hlalefo ea hao.

²³⁰ Motho e mong joale, u re, “Be, ke hooelelitse.” Ke etsa joalo le ’na. Empa u se ke ua itšepisa hoo.

²³¹ Ke bona bademona ba mefuta eohle ba hooeletsa ba hlabatlatse. Ke bone Mohammedane a hooeletsa a hlabatlatse ho fihlela, ba iphuluha hofihlela, ba itotomela liphatsa ba phunya matsoho a bona. Koana India, ke ba bone ba hooeletsa ’me ba qhomela holimō le tlase, ba tšoara libolo tsa metsi, tse hoketsoeng lilope, ba li totometsa lettlalong la bona ’me ba tsamaea holim’ a mashala a chesang a mollo, hantle, ba ntse ba latola Jesu Kreste.

²³² Ua bona, u se ke ua itšepa hlalefo ea hao, empa holim’ a Lentsoe la Molimo. Efèla ha bophelo ba hao bo sa bape le hoo, le Bibele ena, ho lumela Lentsoe le leng le le leng le le leng ka mona; ’me u batla ho e lumela, ’me u batla Molimo o phethise thato ea Oona ka uena, hobane u ka fetoha karolo ea Molimo, na u ka ema ua re, “Ke tla e amohela hona joale, moena.” Kea u leboha. Kea u leboha. Molimo a u hlohonolofatse. Ho a babatseha. Molimo a u hlohonolofatse. Molimo a le abele eona, bohole bana ba tšepahalang. U re . . . Feela—feela lula u eme, feela . . .

²³³ U re, “Ke setho sa kereke, Moena Branham, empa ruri ke Mopentekosta; empa ruri ha ho fihla ho ipolela ruri nka lumela Lentsoe lohle e le ’Nete, ha ke khone ho e etsa feela, empa ke—ke batla ho e etsa. U nthuse, u nthapelle. Ke batla ho ema le ho re, ‘Ke—ke . . .’” U re, “Be, sheba, ho lula mona, kapa ke pakile ka har’ a kereke ena, hore ke ne ke le joalo.” Empa ua tseba, tlase pelōng ea hao, ha u joalo. Molimo o u tseba u se joalo, hape, ua bona, ka hona hobaneng u sa eme feela. U se ke ua itšepa hlalefo ea hao, empa u itšetlehe ka Lentsoe la Oona.

²³⁴ Na le ka ema, ba bang hape? Mang ea batlōg ho ema? Molimo a u hlohonolofatse. Molimo a u hlohonolofatse. Molimo

a u hlohonolofatse, uena. "Molimo, nthuse." Molimo a le hlohonolofatse kaofela. Ke botle. Le sa tsoa le eme.

²³⁵ Ho re, "Na ebe hoo ho ka nthusa ka letho?" Ak'o eme khetlo le leng, u bone haeba ho le joalo ruri. Tiae ka eona, "Kea batla, Moena Branham, ke batla ho lōka. Ke batla ho lōka."

²³⁶ Joale, ha ke re u tlohele kereke ea hao. Che, monghali. Lula hantle moo u leng teng, e ba motho oa makhonthe ea tletseng Moea o Halalelang ka kerekeng eo. U re, "Be, ha ke tsebe seo molisa oa ka a tlāng ho se bua." O tla u ananelā haeba u le eēna, haeba e le monna oa Molimo. Ke hantle.

²³⁷ "Leseli la lōna le khantšetse batho ba tle ba bone mesebetsi ea lōna e molemo 'me ba rorise Ntata lōna."

²³⁸ Molimo a u hlohonolofatse. Be, Molimo o le hlohonolofatse bobeli ba lōna, le uena; le uena, moena, uena. Molimo o hlohonolofatse, e mong le e mong. Molimo a u hlohonolofatse. Molimo a u hlohonolofatse tlase mona.

²³⁹ Joale uena ea emeng, haeba u ikutloa betere ka mora ho ema, phahamisa matsoho a hao feela ho bolella ba bang u ikutloa betere ka mora hoba u eme. Ua bona, letsoho le leng le le leng. Ehlide, u joalo. Ua bona, u tsepahetse. U eme, ho re, "Ke tla ba paki."

²⁴⁰ "Ea tlāng ho emela 'Na mona, Ke tla mo emela mono. Ea soabang ka 'Na mona pel'a batho bana, le 'na Ke tla mo soabela pel'a Ntate oa Ka le Mangeloi a halalelang." U se ke ua Mo soabela. U se ke ua itšepisa lebaka la hao. U itšepise Lentsoe la Molimo. "Ea tlāng ho Mpaka pel'a batho, Ke tla mo paka pel'a Ntate oa Ka le Mangeloi a halalelang."

²⁴¹ Na ba bang ba ka ba teng, pejana re rapela feela? Ha re inamiseng lihlooho tsa rōna ke hona. Molimo a u hlohonolofatse, khaitseli. Ehlide. Molimo a u hlohonolofatse, le uena, moena. Ruri. Na e mong a ka ba teng, re sa inamisitse lihlooho tsa rōna feela? Molimo a u hlohonolofatse, uena. Joale, ke hantle, le sa ntse le eme. Re tla ema nakoana feela, nakoana feela. Molimo a u hlohonolofatse, moena. Molimo a u hlohonolofatse. Ho re, "Na ehlile ho bolela letho, ho rialo, 'Molimo a u hlohonolofatse'?" Mono ke ho bolela mahlohonolo a ka holim'a lōna. Molimo a u hlohonolofatse.

²⁴² Bang ba lōna ba itšetlehileng ka lebota, ha ho moo le lulang, na le ka phahamisa letsoho la lōna, ho re, "'Na, Molimo, ke 'na'?" Molimo a u hlohonolofatse, moena. Molimo a u hlohonolofatse, le uena; le uena, khaitseli; le uena, moena oa ka; le uena, khaitseli ea ka.

²⁴³ Oh, Moea o Halalelang o tsamaea ka mosa holim'a mokhupi. Na le utloa Hoo? Molimo a u hlohonolofatse, mohlankanyana holimō mona kalaneng. Molimo a u hlohonolofatse, koana k'honeng. Molimo a u hlohonolofatse, mothaka e mocha. E.

²⁴⁴ Oho Moea o Halalelang, haola lipelōng tsa rōna ka bocha hona joale. Re bontše liphoso tsa rōna, Morena. Ha re . . . Ha re ka ke ra itšepa hlalefo ea rōna, mabaka a rōna. Empa re itsepisa ka Uena, hoba rea tseba re eme Khalalelong ea Hao, e leng tšepiso e nètefalitsoeng ea kajeno. U Itsebisitse ka hohle, ha ho mabaka afe feela. Re be re ka sitoa ho e hhalosa. Empa U theohetse hantle mahareng a rōna mona joale, le ho re tsebisa hobane U teng mona, 'me banna le basali ba lumela 'me ba e amohela.

²⁴⁵ Molimo, sika e mong le e mong oa bona sefubeng sa Hao, le ho ba pata Lefikeng la Mengoaha hofihlela mello e fetile. Re mothating oa ho chesoa, Morena. Rea e tseba. Re khutletse Sodoma. "Empa ba lōkileng ba ke ke ba timetsoa le ba molato." U tla bitsa bana ba Hao, Morena. U boleletse Lota, "Tsoa mona. Tsoa." Kea rapela, Molimo, mang le mang ea maemong ao bosiung bona, ea leng kantle mane, a sa kholiseha moo ba emeng teng . . .

²⁴⁶ Molimo, ba ke ke ba ipeha kotsing ea ho khanna seterateng se phallelang nqa e 'ngoe, nqa e phoso. Ba ke ke ba ipeha kotsing ea ho tiola lebone le lefubelu, haeba kelello ea bona e sebetsa hantle, hobane ba ka bolaao. Ebe motho a ka ipeha kotsing ea pheletso ea bona ea Bosafeleng, ka ho akanya feela, ho lekanya, ho sebetsa ruri u sa laeloa ho sebetsa, hobane e le setho sa kereke kapa sa mokhatlo oa bolumlo? 'Me ruri ha ba khone, ha ba utloisise kamoo Lentsoe la Molimo kajeno le ka tšoanang le mohlang oo, kamoo litšepiso tsena li ka bonahatsoang kateng. "Mongoaha oa boapostola o fetile." Ba thuse, Ntate. Ke ba laetsa ho Uena ka Lebitso la Jesu Kreste. Amen.

²⁴⁷ Kea u leboha, moena oa ka, khaitseli. Ke thabile haholo ho le bitsa moena oa ka, khaitseli.

²⁴⁸ Le hopole, Molimo o tla mpotsa lentsoe ka leng, ka Letsatsi la Kahlolo. Sohle seo ke se rerileng bosiung bona, ke tlameha ho se arabela. Ke hlokomela seo. 'Me ke entseng ho tloha ke le moshanyana, haese ho rera Evangeli ena, ebe moo ke lahleloang kantle?

²⁴⁹ Joale ba kulang le ba mahlomoleng ba bakae ho lōna, mona bosiu bona, 'me le batla ho rapelloa? Phahamisa letsoho la hao. Joale na le ka nketsetsa ho hong hape? Beanang matsoho. Le beane matsoho. E mong le e mong a inamise hlooho ea hae joale, joaloka ha u le ka kerekeng, holimō mona kalaneng.

²⁵⁰ Molimo o ratehang, ka Lebitso la Jesu Kreste, le ka Boteng ba Hae, Boteng bo nètefalitsoeng! Lona Lentsoe le reroang, le thasisitsoe hoba e sa le Uena maobane, kajeno, le ka mehla. E re Moea o Halalelang oa Molimo o haole holim'a letšoole lena la batho hona joale feela. Bongata ba bona bo tlide ba U amohela joaloka Mopholosi oa bona, ba oeleng mohaung ba U amohetse 'me ba khuttile. Oho Molimo, ke rapela ka Lebitso la Jesu Kreste, hore U folise motho e mong le e mong. U boletse, "Mehlolo e tla

tsamaea le ba lumelang ke eona ena; ha ba beha bakuli matsoho, ba tla fola.” U e tsepisitse, Morena, ’me bana ba lumelang ba beane matsoho holimō.

²⁵¹ Satane, u hlotsoe. Tsoa bathong bana, ka Lebitso la Jesu Kreste. Tlohela batho, bakeng sa ’Muso oa Molimo, ka Lebitso la Jesu. Amen.

²⁵² Bohle ba lumelang Jesu Kreste e le Mophekoli oa lōna joale, le Mopholosi oa lōna, ’me le batla ho Mo amohela holim’ a metheo eo, emang ka maoto a lōna, le re, “Joale ke amohela Jesu e le Mophekoli oa ka, le Mopholosi oa ka hape.” Ho a babatseha! Ho bokoe Morena! Ho lebohuoe Morena! Joale ha re phahamiseng matsoho a rōna re Mo binele.

Ke tla Mo rorisa, ke tla Mo rorisa,
Rorisa Konyana ea baetsalibe;
Tlotlisang Eēna, lōna batho bohle,
Mali a Hae a tlositse sekoli ka seng.

²⁵³ Oh, na ha le ikutloe le thabile? Tsokotsang matsoho a lōna. Oh, banna! A re se bineng hape.

Ke tla Mo rorisa, ke tla Mo rorisa,
Rorisa Konyana ea . . . (Hopola, “eēna
maobane, kajeno, le mehla,” Konyana eo e
joalo.)
Tlotlisang Eēna, lōna batho bohle,
Mali a Hae a tlositse sekoli ka seng.

²⁵⁴ Na le rata seo? [Phuthetho e hooeletsa, “Alleluia!”—Mohl.] Amen. Ha re tsukutlaneng le motho e mong ka matsoho. Ana ke mafube a kōpano, qalo ea seboka. Ho re, “Molimo a u hlohonolofatse, moena, mojaki. Molimo a u hlohonolofatse.” Ke botle. Ke hantle. Ho a babatseha! Joale na le lumela re tla tšoara seboka se seholo ka morao ho mona? [“Amen.”] Re leboha Molimo ka kōpano e khōlō, joale re tla tšoara seboka se seholo. Bohle ba e lumelang, e reng, “Amen.” [“Amen.”]

Tumelo ea ka e lelala ho Uena,
Uena Konyana (ha re Mo shalimeng joale) ea
Kalvari,
Oho ’Moloki ea Khethehileng;
Nkutloe joale kea rapela,
Tlosa sebe sohle sa ka,
Oho ho tloha kajeno
Ke be oa Hao ka bottlalo!

Ha ke tsamaea tsela e lifi,
Le maqakabetsi a ntika,
E ba Lesupatsela la ka;
Laela lefifi e be letše share,
Phumula u tlose litšabo,
Oho ho tloha kajeno
Ke ua Hao ka bottlalo!

²⁵⁵ Amen! Phutheho e itse, “Amen.” [Phutheho e re, “Amen.”—Mohl.] Alleluia!

Oh, ho Mo rorisa,
Rorisa Konyana ea baetsalibe;
Tlotlisang Eèna, lõna batho bohole,
Mali a Hae a tlositse koli ka seng.

Ho babatseha hakakang!

²⁵⁶ Ho lõkile, na re ka inamisa lihlooho tsa rōna joale hlohonolofatsong. Ha ke tsebe ea khethetsoeng hona. Moena Johnny Manadal, ho tsoa California, re sa inamisitse lihlooho tsa rōna. Joale le se lebale hosane bosiu, ke la pele, qalo. Hosane bosiu, seboka se tla tšoaroa mona hantle, hantle kahara holo ena mona, ka mashome a mararō ka morao ho supa.

²⁵⁷ Molimo o le hlohonolofatse. Na le natefetsoe ke Sefahleho sa Molimo? [Phutheho e re, “Amen.”—Mohl.] Amen. Joale ha re inamiseng hlooho tsa rōna Moena Johnny a sa re qhalanya. 

U SE KE UA ITŠEPA HLALEFO EA HAO SST65-0120
(Lean Not Unto Thy Own Understanding)

Molaetsa ona, ka Moena William Marrion Branham, o reriloe sethatong ka Senyesemane, Laboraro mantsiboea, Pherekhong 20, 1965, sebokeng sa Full Gospel Business Men's Fellowship International, Ramada Inn, Phoenix, Arizona, U.S.A. o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org